

A silhouette of a person's head and shoulders in profile, looking upwards. The background is a bright, hazy scene of sunlight filtering through green foliage, creating a bokeh effect. The overall mood is contemplative and serene.

অন্যভূবন

হুমায়ূন আহমেদ



অন্যভূবন

হুমায়ূন আহমেদ



অনন্যা

৩৮/২ বাংলাবাজার ঢাকা



প্রকাশক ☐ মনিরুল হক

অনন্যা

৩৮/২ বাংলাবাজার ঢাকা

প্রথম প্রকাশ ☐ জানুয়ারি ১৯৮৭

একাদশ মুদ্রণ ☐ সেপ্টেম্বর ২০০৭

দ্বাদশ মুদ্রণ ☐ ফেব্রুয়ারি ২০১২

স্বত্ব ☐ লেখক

প্রচ্ছদ ও অলংকরণ ☐ ধ্রুব এশ

আলোকচিত্র ☐ গোলাম মুস্তাফা, পলাশ খান

কম্পোজ ☐ তব্বী কম্পিউটার

৩৮/৪ বাংলাবাজার, ঢাকা-১১০০

মুদ্রণ ☐ পাগিনি প্রিন্টার্স

১৪/১ তনুগঞ্জ লেন, সুত্রাপুর, ঢাকা

দাম ☐ আশি টাকা টাকা

ISBN 984 412 004 7

Annyavuban by Humayun Ahmed

Published By : Monirul Hoque, Ananya, 38/2 Banglabazar, Dhaka-1100

12th Edition : February 2012, Cover Design : Dhruvo Esh

Price : 80.00 Taka Only

U.K Distributor ☐ **Sangeeta Limited**

22 Brick Lane, London

U.S.A Distributor ☐ **Muktadhara**

37-69, 74 St. 2nd Floor, Jackson Hights, N.Y. 11372

Canada Distributor ☐ **Anyamela**

300 Danforth Ave., Toronto (1st floor) suite-202

Canada Distributor ☐ **ATN Mega Store**

2970 Danforth Ave., Toronto

বাংলাদেশের দাবা বিশ্বয়
নিয়াজ মোর্শেদ
জয়যুক্তেষু



দুপুরবেলা কাজের মেয়েটি মিসির আলিকে ডেকে তুলল। কে নাকি দেখা করতে এসেছে। খুব জরুরি দরকার।

মিসির আলির রাগে গা কাঁপতে লাগল। কাজের মেয়েটিকে বলে দেয়া ছিল কিছুতেই যেন তাঁকে তিনটার আগে ডেকে তোলা না হয়। এখন ঘড়িতে বাজছে দুটা দশ। যত জরুরি কাজই থাকুক এই সময় তাকে ডেকে তোলার কথা নয়। মিসির আলি রাগ কমাবার জন্যে উল্টোদিকে দশ থেকে এক পর্যন্ত গুনলেন। গুনগুন করে মনে মনে গাইলেন— আজি এ বসন্তে এত ফুল ফুটে এত পাখি গায়। এই গানটি গাইলে তাঁর রাগ আপনাতেই কিছুটা নেমে যায়। কিন্তু আজ নামছে না। কাজের মেয়েটির ভাবলেশহীন মুখ দেখে তা আরো বেড়ে যাচ্ছে। তিনি গম্ভীর গলায় ডাকলেন, রেবা।

জি।

আর কোনোদিন তুমি আমাকে তিনটার আগে ডেকে তুলবে না।

জি আইচ্ছা।

দুটো থেকে তিনটা এই এক ঘণ্টা আমি প্রতিদিন দুপুরে ঘুমিয়ে থাকি। এর নাম হচ্ছে সিয়াস্তা। বুঝলে?

জি।

ঘড়ি দেখতে জান?

জি না।

মিসির আলির রাগ দপ করে নিভে গেল। যে মেয়ে ঘড়ি দেখতে জানে না, সে তাকে তিনটার সময় ডেকে তুলষে কীভাবে? রেবা মেয়েটি নতুন কাজে এসেছে। তাকে শিখিয়ে-পড়িয়ে নিতে হবে।

রেবা।

জি।

আজ সন্ধ্যার পর তোমাকে ঘড়ি দেখা শেখাব। এক থেকে বার পর্যন্ত সংখ্যা প্রথম শিখতে হবে। ঠিক আছে?

জি ঠিক আছে।

এখন বল, যে লোকটি দেখা করতে এসেছে, সে কেমন?

রেবা অবাক হয়ে তাকিয়ে রইল। মানুষ মানুষের মতোই, আবার কেমন হবে। তার এই সাহেব কী সব অদ্ভুত কথাবার্তা যে বলে! পাগলা ধরনের কথাবার্তা।

বল বল, চুপ করে আছ কেন?

মিসির আলি বিরক্ত হলেন। এই মেয়েকে কাজ শেখাতে সময় লাগবে। তিনি গম্ভীর মুখে বললেন, মানুষকে দেখতে হবে খুঁটিয়ে খুঁটিয়ে বুঝতে পারছ?

মেয়েটি মাথা নাড়ল। মাথা নাড়ার ভঙ্গি থেকেই বলে দেয়া যায় সে কিছুই বুঝে নি। বোঝার চেষ্টাও করে নি। সে শুধু ভাবছে এই লোকটির মাথায় দোষ আছে। তবে

দোষ থাকলেও লোকটা ভালো। বেশ ভালো। রেবা এ পর্যন্ত দুটি গ্লাস, একটা পিরিচ এবং একটা প্লেট ভেঙেছে। একটা কাপের বোঁটা আলগা করে ফেলেছে। সে তাকে কিছুই বলে নি। একটা ধমক পর্যন্ত দেয় নি। ভালো মানুষগুলি একটু পাগল-পাগলই হয়ে থাকে।

মিসির আলি হাত বাড়িয়ে সিগারেটের প্যাকেট নিলেন। একটি সিগারেট বের করে হাত দিয়ে গুঁড়ো করে ফেললেন। তিনি সিগারেট ছাড়বার চেষ্টা করছেন। যখনই খুব খেতে ইচ্ছা করে তিনি একটি সিগারেট বের করে গুঁড়ো করে ফেলেন। এবং ভাবতে চেষ্টা করেন একটি সিগারেট টানা হল। এতে কোনো লাভ হচ্ছে না, শুধু মেজাজ তিরিক্ষি হয়ে যাচ্ছে।

রেবা।

জি।

এখন আমি তোমাকে কিছু প্রশ্ন করব। তুমি উত্তর দেবে। তোমার উত্তর থেকে আমি ধারণা করতে পারব যে লোকটি এসেছে সে কীরকম।

রেবা হাসল। তার বেশ মজা লাগছে।

প্রথম প্রশ্ন, যে লোকটি এসেছে সে গ্রামে থাকে না শহরে?

গেরামে।

লোকটি বুড়ো না জোয়ান?

জোয়ান।

রোগা না মোটা?

রোগা।

কী কাপড় পরে এসেছে?

মনে নাই।

কাপড় পরিষ্কার না ময়লা?

ময়লা।

হাতে কী আছে? ব্যাগ বা ছাতা এসব কিছু আছে?

না।

চোখে চশমা আছে?

না।

মিসির আলি থেমে-থেমে বললেন, তোমাকে যে প্রশ্নগুলি করলাম সেগুলি মনে রাখবে। কেউ আমার কাছে এলে আমি এইগুলি জানতে চাই। বুঝতে পারছ?

জি।

এখন যাও আমার জন্যে এক কাপ চমৎকার চা বানাও। দুধ চিনি কিছু দেবে না। শুধু লিকার। বানানো হয়ে গেলে চায়ের কাপে এক দানা লবণ ফেলে দেবে।

লবণ?

হ্যাঁ লবণ।

মিসির আলি উঠে দাঁড়ালেন। বসার ঘরে যে লোকটি এসেছে তাকে দেখা দরকার। রেবার কথামতো লোকটি হবে গ্রামের, ময়লা কাপড় পরে এসেছে। জোয়ান বয়স। হাতে কিছুই নেই। এই ধরনের একজন লোকের তাঁর কাছে কী প্রয়োজন থাকতে পারে?

বসার ঘরে যে লোকটি বসে ছিল সে রোগা নয়। পরনে গ্যাভার্ডিনের স্যুট। হাতে চামড়ার একটি ব্যাগ। বয়স পঞ্চাশের উপরে। চোখে চশমা। মিসির আলি মনে মনে একটি দীর্ঘনিশ্বাস ফেললেন। রেবা মেয়েটির পর্যবেক্ষণ শক্তি মোটেই নেই। একে বেশি দিন রাখা যাবে না। মিসির আলি বসে থাকা লোকটিকে তীক্ষ্ণ চোখে দেখতে লাগলেন।

তিনি ঘরে ঢোকার সময় লোকটি উঠে দাঁড়ায় নি। দাঁড়াবার মতো ভঙ্গি করেছে। বসে থাকার মধ্যেও একটা স্পর্ধার ভাব আছে। লোকটি তাকিয়ে আছে সরু চোখে। যেন সে কিছু একটা যাচাই করে নিচ্ছে। মিসির আলি বললেন, ভাই আপনার নাম?

আমার নাম বরকতউল্লাহ। আমি ময়মনসিংহ থেকে এসেছি।

কোনো কাজে এসেছেন কি?

হ্যাঁ, কাজেই এসেছি। আমি অকাজে ঘুরাঘুরি করি না।

আমার কাছে এসেছেন?

আপনার কাছে না এলে আপনার ঘরে বসে আছি কেন?

ভালোই বলেছেন। এখন বলুন কী ব্যাপার। অল্প কথায় বলুন।

বরকতউল্লাহ সাহেব থমথমে গলায় বললেন, আমি কথা কম বলি। আপনাকে বেশিক্ষণ বিরক্ত করব না।

তিনি লক্ষ্য করলেন লোকটি আহত হয়েছে। তার চোখ মুখ লাল। মিসির আলি খুশি হলেন। লোকটি বড় বেশি স্পর্ধা দেখাচ্ছে।

বরকতউল্লাহ সাহেব, চা খাবেন?

জ্বিনা, আমি চা খাই না। আমার যা বলার তা আমি খুব অল্পকথায় বলে চলে যাব।

মিসির আলি হাসতে হাসতে বললেন, অল্প কথায় কিছু বলতে পারবেন বলে আমার বিশ্বাস হচ্ছে না। আপনার অভ্যাস হচ্ছে বেশি কথা বলা। আপনি, চা খাবেন কি না তার জবাব দিতে গিয়ে একটি দীর্ঘ বাক্য বলেছেন। আপনি বলেছেন— জ্বিনা, আমি চা খাই না। আমার যা বলার তা আমি খুব অল্প কথায় বলে চলে যাব। এই বাক্যটিতে সতেরটি শব্দ আছে।

বরকতউল্লাহ সাহেব অবাক হয়ে তাকালেন। তাঁর দ্রুত কুণ্ঠিত হল। মিসির আলি মনে মনে হাসলেন। কাউকে বুদ্ধির খেলায় হারাতে পারলে তাঁর খুব আনন্দ হয়।

বরকতউল্লাহ সাহেব আপনি কী চান?

আপনার সাহায্য চাই। তার জন্যে আমি আপনাকে যথাযথ সম্মানী দেব। আমি ধনাঢ্য ব্যক্তি না হলেও দরিদ্র নই। আমি চেক বই সঙ্গে নিয়ে এসেছি।

ভদ্রলোক কোটের পকেটে হাত দিলেন। মিসির আলির খানিকটা মনখারাপ হয়ে গেল। ধনবান ব্যক্তির দরিদ্রের কাছে প্রথমেই নিজেদের অর্থের কথা বলে কেন ভাবতে লাগলেন।

বরকতউল্লাহ বললেন, আমি কি আমার সমস্যাটার কথা আপনাকে বলব?

মিসির আলি বললেন, তার আগে জানতে চাই আপনি আমার নাম জানলেন কী করে? আমি এমন কোনো বিখ্যাত ব্যক্তি নই যে ময়মনসিংহের একজন লোক আমার নাম জানবে।

বরকতউল্লাহ নিচুস্বরে বললেন, আমি খুঁজছি একজন ভালো সাইকিয়াট্রিস্ট। যাঁর কাছে আমি অকপটে আমার কথা বলতে পারব। যে আমার কথায় লাফিয়ে উঠবে না,

আবার অবিশ্বাসীর হাসিও হাসবে না। আমি জানি আপনি সে-রকম একজন মানুষ। কী করে জানি তা তেমন জরুরি নয়।

মিসির আলির মনে হল লোকটা বেশ বুদ্ধিমান। গুছিয়ে কথা বলতে জানে। যার মানে হচ্ছে গুছিয়ে কথা বলার অভ্যাস তার আছে। লোকটি সম্ভবত একজন ব্যবসায়ী। সফল ব্যবসায়ীদের নানা ধরনের লোকজনদের সঙ্গে খুব গুছিয়ে কথা বলতে হয়।

বরকতউল্লাহ সাহেব, আপনি কি একজন ব্যবসায়ী?

হ্যাঁ আমি একজন ব্যবসায়ী।

কতদিন ধরে ব্যবসা করছেন?

প্রায় দশ বছর। এখন করছি না।

কিসের ব্যবসা?

আপনি আমাকে জেরা করছেন কন বুঝতে পারছি না।

আপনার সমস্যা নিয়ে আমি মাথা ঘামাব কি না, তা জানার জন্যে জেরা করছি। যদি আপনাকে আমার পছন্দ হয় তবেই আপনার কথা শুনব। সবার সমস্যা নিয়ে আমি মাথা ঘামাই না।

যথেষ্ট পরিমাণ টাকা পেলেও না?

না। আমার সম্পর্কে ভালোরকম খোঁজখবর আপনি নেন নি। যদি নিতেন তাহলে জানতেন যে আমি টাকা নেই না।

বরকতউল্লাহ সাহেব দীর্ঘ সময় চুপ করে রইলেন। তিনি তাঁর সামনে বসে থাকা রোগা ও বেঁটে লোকটিকে ঠিক বুঝে উঠতে পারছেন না। কথাবার্তা বলছে অহংকারী মানুষের মতো কিন্তু বলার ভঙ্গিটি সহজ ও স্বাভাবিক।

আপনি টাকা নেন না কেন, জানতে পারি কি?

নিশ্চয়ই পারেন। টাকা নিলেই একধরনের বাধ্যবাধকতা এসে পড়ে। আমি তার মধ্যে যেতে চাই না। অন্যের সমস্যা নিয়ে চিন্তা করা আমার পেশা নয়, শখ। শখের ব্যাপারে কোনোরকম বাধ্যবাধকতা থাকা উচিত নয়। কী বলেন?

ঠিকই বলছেন। আমি আপনার সব প্রশ্নের জবাব দেব। কী জানতে চান বলুন?

আপনার পড়াশোনা কতদূর?

এম.এ. পাশ করেছি পলেটিক্যাল সায়েন্স।

আপনি বলছেন ব্যবসা ছেড়ে দিয়েছেন, কেন?

এই প্রশ্নের জবাব আপনাকে পরে দেব। অন্য প্রশ্ন করুন।

আপনি বিবাহিত?

হ্যাঁ। আমার ন' বছর বয়েসী একটি মেয়ে আছে।

আপনার সমস্যা এই মেয়েকে নিয়েই, নয় কি?

জি হা। কী করে বুঝলেন?

মেয়ের কথা বলার সময় আপনার গলার স্বর পাঁটে গেল, তাই থেকেই আন্দাজ করছি। আপনার স্ত্রী মারা গেছেন কতদিন হল?

পাঁচ বছর হল। স্ত্রী মারা গেছেন সেটা কী করে বলতে পারলেন?

বাচ্চাদের কোনো সমস্যা হলে মা নিজে আসেন। এ ক্ষেত্রে আসেন নি দেখে সন্দেহ হয়েছিল। তাছাড়া বিপত্নীক মানুষদের দেখলেই চেনা যায়।

আমি কি এবার আমার ব্যাপারটা বলব?

বলুন।

সংক্ষেপে বলতে হবে?

না, সংক্ষেপে বলার দরকার নেই। চা দিতে বলি?

জি না আমি চা খাই না। একগ্লাস ঠাণ্ডা পানি দিতে বলুন, খুব ঠাণ্ডা। তৃষ্ণা হচ্ছে।

আমার ঘরে ফ্রিজ নেই। পানি খুব ঠাণ্ডা হবে না।

ভদ্রলোক তৃষ্ণার্তের মতোই পানির গ্লাস শেষ করে দ্বিতীয় গ্লাস চাইলেন। মিসির আলি বললেন, আরেক গ্লাস দেব?

আর লাগবে না।

আপনি তাহলে শুরু করুন। আপনার মেয়ের নাম কী?

তিনি।

বলুন তিনি কথায়।

ভদ্রলোক কিছুক্ষণ চুপ করে রইলেন। সম্ভবত মনে মনে গুছিয়ে নিচ্ছেন। কিংবা বুঝে উঠতে পারছেন না ঠিক কোন্ জায়গা থেকে শুরু করবেন। মিসির আলি লক্ষ্য করলেন ভদ্রলোকের কপালে সূক্ষ্ম ঘামের কণা জমতে শুরু করেছে। মিসির আলি ঠিক বুঝে উঠতে পারছেন না, ন'বছর বয়েসী একটি মেয়ের এমন কী সমস্যা থাকতে পারে যা বলতে গিয়ে এমন অস্বস্তির মধ্যে পড়তে হয়।

বলুন আপনার মেয়ের কথা বলুন।

ভদ্রলোক বলতে শুরু করলেন।

আমার মেয়ের নাম তিনি।

ওর বয়স ন' বছর। মেয়ের জন্মের সময় ওর মা মারা যায়। মেয়েটিকে আমি নিজেই মানুষ করি। আমি মোটামুটিভাবে একজন সচ্ছল মানুষ। কাজেই আমার পক্ষে বেশকিছু কাজের লোকজন রাখা কোনো সমস্যা ছিল না। তিনিকে দেখাশোনার জন্যে অনেকেই ছিল। কিন্তু তবু মেয়েটির বেশিরভাগ দায়িত্ব আমি পালন করেছি। দুখ বানানো, খাওয়ানো, ঘুম পড়ানো—সবই আমি করতাম। বুঝতেই পারছেন মেয়েটি আমার খুবই আদরের। সব বাবার কাছেই তাদের ছেলেমেয়ের আদর থাকে কিন্তু আমার মধ্যে বাড়াবাড়ি রকমের ছিল।

মিসির আলি বললেন, আপনি কি বলতে চাচ্ছেন এখন নেই?

ভদ্রলোক এই প্রশ্নের জবাব দিলেন না। তাঁর মেয়ের কথা বলে যেতে লাগলেন। তিনি এমন একটি ভঙ্গি করলেন যেন প্রশ্নটি শুনতে পান নি।

তিনি বয়স যখন এক বৎসর তখন লক্ষ্য করলাম ও অন্যান্য শিশুদের মতো নয়। সাধারণত এক বৎসর বয়সেই শিশুরা কথা বলতে শুরু করে। তিনি বেলা তা হল না। সে কথা বলা শিখল না। বড় বড় ডাক্তাররা সবাই দেখলেন। তাঁরাও কোনো কারণ বের করতে পারলেন না। মেয়েটি কানে শুনতে পায়। তার ভোকাল-কর্ড ঠিক আছে। কিন্তু কথা বলে না। কেউ কিছু বললে মন দিয়ে শুনে— এই পর্যন্তই।

ই এন টি স্পেশালিস্ট প্রফেসর আলম বললেন— অনেক বাচ্চারাই দেহিতে কথা শেখে। এর বেলাও তাই হচ্ছে। দেহি হচ্ছে। আপনি আপনার মেয়ের সঙ্গে দিনরাত কথা বলবেন। ও শুনে, শুনে শিখবে।

আমি প্রফেসর আলমের পরামর্শমতো প্রচুর কথা বলতাম। গল্প পড়ে শুনাতাম। সিনেমায় নিয়ে যেতাম। কিন্তু কোনো লাভ হল না। মেয়েটি একটি কথাও বলল না।

ওর যখন ছ'বছর বয়স তখন একটা অদ্ভুত ব্যাপার হল। দিনটি আমার পরিষ্কার মনে আছে। জুলাই মাসের তিন তারিখ, শুক্রবার। আমি দুপুরের খাওয়া-দাওয়ার পর ঘুমুচ্ছি। শরীরটা ভালো যাচ্ছিল না। জ্বর-জ্বর ভাব। হঠাৎ তিনি আমাকে ধাক্কা দিয়ে ঘুম থেকে জাগাল। এবং পরিষ্কার গলায় বলল, বাবা অসময়ে ঘুমুচ্ছ কেন?

আপনি বুঝতেই পারছেন আমি স্তম্ভিত হয়ে তাকিয়ে রইলাম। প্রথমে ভাবলাম স্বপ্ন দেখেছি। তিনি কথা বলেছে। একটি দুটি শব্দ নয়, পুরো বাক্য বলেছে। অত্যন্ত স্বাভাবিক ভঙ্গিতে বলেছে। কোনোরকম জড়তা নয়, অস্পষ্টতা নয়। বিষয় সামলাতে আমার দীর্ঘ সময় লাগল। আমি একসময় বললাম, তুই কথা বলা জানিস?

তিনি হাসিমুখে বলল, হ্যাঁ। কেন জানব না?

এতদিন কথা বলিসনি কেন?

তিনি তার জবাব দিল না। ঠোঁট টিপে হাসতে লাগল। যেন সে খুব মজা পাচ্ছে। এটা যেন চমৎকার একটা রসিকতা, কথা না বলে বাবাকে বোকা বানানো।

মিসির আলি সাহেব, আপনি নিশ্চয়ই বুঝতে পারছেন নতুন এই পরিস্থিতির সঙ্গে খাপ খাইয়ে উঠতে আমার সময় লাগল। তবে আমি ঠাণ্ডা ধরনের মানুষ। আমি কোনো কিছু নিয়েই হৈচৈ শুরু করি না। প্রথমে নিজে বুঝতে চেষ্টা করি। কিন্তু তিনি ব্যাপারটা আমি কিছুই বুঝলাম না। হঠাৎ করে কথা বলা শুরু করা ছাড়াও তার মধ্যে অনেক বড় ধরনের অস্বাভাবিকতা ছিল।

এই পর্যন্ত বলেই বরকতউল্লাহ সাহেব থামলেন। পানি খেতে চাইলেন। মিসির আলি তাকিয়ে রইলেন তীক্ষ্ণ দৃষ্টিতে। বরকতউল্লাহ সাহেব নিচুগলায় আবার কথা শুরু করলেন।

আমি লক্ষ্য করলাম তিনি সব প্রশ্নের জবাব জানে।

মিসির আলি বললেন, আমি আপনার কথা বুঝতে পারছি না। সব প্রশ্নের জবাব জানে মানে?

আপনাকে উদাহরণ দিলে ভালো বুঝবেন। ধরুন আমি তিনিকে জিজ্ঞেস করলাম— ষোলর বর্গমূল কত? সে একমুহূর্ত ইতস্তত না করে বলবে 'চার'। যদিও সে অঙ্কের কিছুই জানে না। যে মেয়ে কথা বলতে পারে না তাকে অঙ্ক শেখানোর প্রশ্নই ওঠে না।

আপনাকে আরেকটি উদাহরণ দেই। একদিন বাসায় ফিরে তিনিকে জিজ্ঞেস করলাম, বল্ তো মা আজ নয়াবাজারে কার সঙ্গে দেখা হয়েছে? সে সঙ্গে সঙ্গে বলল, হালিম সাহেবের সঙ্গে।

হালিম আমার বাল্যবন্ধু। তিনি তাকে চেনে না। তার সঙ্গে আমার মেয়ের কোনো দিন দেখা হয়নি। হালিমের সঙ্গে আমার দেখা হয়েছে এটা তিনি জানার কোনো কারণ নেই। মিসির আলি সাহেব, বুঝতেই পারছেন আমি খুব চিন্তিত হয়ে পড়লাম। তার কিছুদিন পর আরেকটি অদ্ভুত ব্যাপার ঘটল।

রাতের বেলা তিনিকে নিয়ে খেতে বসেছি। হঠাৎ ইলেকট্রিসিটি চলে গেল। আমি হারিকেন জ্বালানোর জন্যে বললাম। কেউ হারিকেন খুঁজে পেল না। প্রয়োজনের সময়

কিছুই খুঁজে পাওয়া যায় না। টর্চ আনতে বললাম, তাও কেউ পাচ্ছে না। আমি বিরক্ত হয়ে ধমকাদমকি করছি। তখন তিনি বলল, বাতি চলে গেলে সবাই এত হৈ চৈ করে কেন?

আমি বললাম, অন্ধকার হয়ে যায় তাই।

অন্ধকার হলে কী অসুবিধা?

অন্ধকারে কিছু দেখা যায় না সেটাই অসুবিধা।

তুমি দেখতে পাও না?

শুধু আমি কেন কেউই পায় না। আলো ছাড়া কিছুই দেখা যায় না মা।

তিনি খুবই অবাক হল, বিস্মিত গলায় বলল, কিন্তু আমি তো অন্ধকারেও দেখতে পাই। আমি তো সবকিছু দেখছি!

প্রথম ভাবলাম সে ঠাট্টা করেছে। কিন্তু না, ঠাট্টা নয়। সে সত্যিকথাই বলছিল। সে অন্ধকারে দেখে। খুব পরিষ্কার দেখে।

বরকতউল্লাহ সাহেব থামলেন। রুমাল বের করে চশমার কাচ পরিষ্কার করতে লাগলেন।

মিসির আলি বললেন, আপনার মেয়ের প্রসঙ্গে আরো কিছু কি বলবেন? তিনি না-সূচক মাথা নাড়লেন।

আর কিছুই বলার নেই?

আছে। কিন্তু এখন আপনাকে বলতে চাই না।

কখন বলবেন?

প্রথম আপনি আমার মেয়েকে দেখবেন। ওর সঙ্গে কথা বলবেন। তারপর আপনাকে বলব।

ঠিক আছে। আপনার মেয়ের এখন বয়স হচ্ছে নয়। মেয়ের অস্বাভাবিকতাগুলি তো আপনার অনেক আগেই চোখে পড়েছে। কোনো ডাক্তারের সঙ্গে কথা বলেছেন?

না। ডাক্তার এর কী করবে?

কোনো সাইকিয়াট্রিস্ট?

না। আপনিই প্রথম ব্যক্তি যার কাছে আমি এসেছি।

মেয়ের এই ব্যাপারগুলি আপনি মনে হচ্ছে লুকিয়ে রাখতে চান।

হ্যাঁ চাই। কেন চাই তা আপনি আমার মেয়ের সঙ্গে কথা বললেই বুঝবেন।

আপনি মেয়ের মা সম্পর্কে কিছু বলুন।

কী জানতে চান?

জানতে চাই উনি কেমন মহিলা ছিলেন। তাঁর মধ্যে কোনোরকম অস্বাভাবিকতা ছিল কি না।

না ছিল না। উনি খুবই স্বাভাবিক মহিলা ছিলেন।

আপনি ভালোমতো জানেন?

হ্যাঁ ভালোমতোই জানি। আমি এগার বছর আমার স্ত্রীর সঙ্গে কাটিয়েছি। তিনি আমাদের শেষ বয়সের সন্তান। এগার বছরে একজন মানুষকে ভালোমতো জানা যায়।

তা জানা যায়। আচ্ছা, আপনার মেয়ের এই ব্যাপারগুলি কি বাইরের অন্য কাউকে বলেছেন?

না, কাউকেই বলিনি। আপনি বুঝতেই পারছেন এটা জানাজানি হওয়া মাত্রই একটা হৈচৈ শুরু হবে। পত্রিকার লোক আসবে, টিভির লোক আসবে। আমি ভাবলাম কিছুতেই এটা করতে দেয়া উচিত হবে না। এখন মিসির আলি সাহেব, দয়া করে বলুন—আপনি কি আমার মেয়েটাকে দেখবেন?

হ্যাঁ দেখব।

কবে যাবেন ময়মনসিংহ?

আপনি কবে যাবেন?

আমি আগামীকাল রাতে যাব। রাত দশটায় একটা ট্রেন আছে নর্থ বেঙ্গল এক্সপ্রেস।

মিসির আলি সহজ স্বরে বললেন, আমি আপনার সঙ্গেই যাব।

বরকতউল্লাহ সাহেব অবাক হয়ে বললেন, আমার সঙ্গে যাবেন?

হ্যাঁ আপনার সঙ্গে যাব। কোনো অসুবিধে হবে?

বরকতউল্লাহ সাহেব মাথা নাড়লেন। কোনো অসুবিধা হবে না। এই লোকটিকে তিনি ঠিক বুঝতে পারছেন না। যে প্রথমে তাঁর কথাই শুনতে চায় নি সে এখন...। কত বিচিত্র স্বভাবের মানুষ আছে এই পৃথিবীতে।



তিনি অবশেষে দুনিয়া পড়েছিল।

ঘুম ভাঙল সন্ধ্যার আগে আগে। আঁধার হয়ে আসছে। চারদিকে সুনসান নীরবতা। দোতলায় কেউ নেই। কেউ থাকে না কখনো। এ বাড়ির সব মানুষজন থাকে একতলায়। তিনি যখন কাউকে ডাকে তখনি সে আসে, তার আগে কেউ আসে না। তিনি কাউকে ডাকতে ইচ্ছা করছে না। সে জানালার পাশে গিয়ে বসল। এখান থেকে রাস্তা দেখা যায়। রাস্তা দিয়ে লোকজন যাওয়া-আসা করছে। নানান ধরনের মানুষ। কারোর সঙ্গে কারোর কোনো মিল নেই। কত মজার মজার কথা একেকজন ভাবছে। কিন্তু ওরা কেউ জানে না তিনি সব বুঝতে পারছে। এইতো একজন মোটা লোক যাচ্ছে। তার হাতে একটা ছাতা। শীতের সময় কেউ ছাতা নিয়ে বের হয়? ছাতাটা কেমন অদ্ভুতভাবে দোলাচ্ছে লোকটা। এবং মনে মনে ভাবছে বাড়ি পৌঁছেই গরম পানি দিয়ে গোসল করে ঘুমাবে। শীতের দিনের সন্ধ্যাবেলায় কেউ ঘুমায়? লোকটার মনে খুব আনন্দ। কারণ সে হঠাৎ করে অনেক টাকা পেয়েছে। কেউ দিয়েছে তাকে। যে দিয়েছে তার নাম রহমত মিয়া।

বুড়োলোকটি চলে যেতেই রোগা একটা মানুষকে দেখা গেল। সে খুব রেগে আছে। কাকে যেন খুব গাল দিচ্ছে। এমন বাজে গাল যে শুনলে খুব রাগ লাগে। তিনি জানালা বন্ধ করে দিল।

ঘরটা এখন অন্ধকার। অন্ধকারে কেউ কিছু দেখতে পায় না। কিন্তু সে পায়। কেউ অন্ধকারে দেখতে পায় না, সে পায় কেন? সে কেন অন্য মানুষদের মতো নয়? কেন সবাই তাকে ভয় পায়? এই-যে সন্ধ্যা হয়ে গেছে, কিন্তু কেউ তার কাছে আসছে না। যতক্ষণ সে না-ডাকবে ততক্ষণ আসবে না। এলেও খুব ভয়ে ভয়ে আসবে। দরজার ওপাশে দাঁড়িয়ে ফিসফিস করে বলবে— তিনি আপা! তিনি আপা!! এমন রাগ লাগে। রাগ হলে তিনি সবাইকে কষ্ট দিতে ইচ্ছা করে। তখন তার কপালের বাঁ পাশে চিনচিনে ব্যথা হয়। ব্যথা হলেই রাগ আরো বেড়ে যায়। রাগ বাড়লে ব্যথা বাড়ে। কী কষ্ট! কী কষ্ট!!

তিনি দরজা খুলে বারান্দায় এসে দাঁড়াল এবং রিনরিনে গলায় ডাকল—নাজিম, নাজিম। নাজিমের পায়ের শব্দ পাওয়া যাচ্ছে। সে ভয়ে ভয়ে সিঁড়ি দিয়ে উঠে আসছে। তিনি তাকে দেখতে পাচ্ছে না। দোতলায় ওঠার সিঁড়ি পেছনের দিকে। কিন্তু তবু তিনি পরিষ্কার বুঝতে পারছে নাজিম রেলিং ধরে ধরে উপরে আসছে, তার হাতে একগ্লাস দুধ। নাজিম তার জন্যে দুধ আনছে। কী বিশী ব্যাপার। সে দুধ চায় নি তবু আনছে। এমন গাধা কেন লোকটা?

তিনি আপা।

তিনি তাকাল না। নাজিম সিঁড়ির মাথায় দাঁড়িয়ে আছে। ভয় পাচ্ছে খুব। ভয়ে তার পা কাঁপছে।

দুধ এনেছেন কেন? দুধ খাব না।
 অন্য কিছু খাবেন আপা?
 না কিছু খাব না।
 জি আছে।
 বাবা কবে আসবে আপনি জানেন?
 জানি না আপা।
 বাবা কাল সকালে আসবে। একা আসবে না। একটা লোককে নিয়ে আসবে!
 নাজিম কিছু বলল না। তিনি কাটা-কাটা গলায় বলল, আপনি আমার কথা বিশ্বাস
 করছেন না, তাই না?
 করছি আপা।
 আমি সবকিছু বুঝতে পারি।
 আমি জানি আপা।
 আপনি আমাকে ভয় করেন কেন?
 আমি ভয় করি না আপা।
 না করেন। আপনারা সবাই আমাকে ভয় করেন। আপনি করেন। আবুর মা করে,
 দারোয়ান করে, সবাই ভয় করে। যান আপনি চলে যান।
 দুখ খাবেন না?
 না খাব না। কিছু খাব না।
 বাতি জ্বালিয়ে দেই?
 না বাতি জ্বালাতে হবে না।
 জি আছে। আমি যাই আপা?
 না আপনি যেতে পারবেন না। আপনি দাঁড়িয়ে থাকুন।
 নাজিম দাঁড়িয়ে রইল। তিনি তার ঘরে ঢুকে ছবি আঁকতে বসল। ঘর এখন নিকষ
 অন্ধকার কিন্তু তাতে তার কোনো অসুবিধা হচ্ছে না। অন্ধকারেই বরং রংগুলি পরিষ্কার
 দেখা যায়। তিনি অতি দ্রুত ব্রাশ চালাচ্ছে। ভালো লাগছে না। কিছু ভালো লাগছে না।
 কান্না পাচ্ছে। সে তার রংগুলি দূরে সরিয়ে কাঁদতে শুরু করল।
 নাজিম ভীত গলায় বলল, কী হয়েছে তিনি আপা?
 তিনি তীক্ষ্ণস্বরে বলল, কিছু হয়নি আপনি চলে যান।
 নাজিম অতি দ্রুত সিঁড়ি থেকে নেমে গেল। যেন সে পালিয়ে বেঁচেছে।



তারা ময়মনসিংহ এসে পৌঁছলেন ভোর রাতে। তখনো চারদিক অন্ধকার। কিছুই দেখার উপায় নেই। মিসির আলির মনে হল বিশাল একটি রাজপ্রাসাদের সামনে দাঁড়িয়ে আছেন। গাছগাছালিতে চারদিক ঢাকা। বারান্দায় অল্প পাওয়ারের একটি বাতি জ্বলছে। তাতে চারদিকের অন্ধকার আরো গাঢ় হয়েছে। মিসির আলি বললেন, রাজবাড়ি বলে মনে হচ্ছে।

বরকত সাহেব শীতল গলায় বললেন, একসময় ছিল। সুসং দুর্গাপুরের মহারাজার বাড়ি। আমি কিনে নিয়েছি।

দারোয়ান গেট খোলা মাত্র ছুটাছুটি শুরু হয়ে গেল। অনেক লোকজন বেরিয়ে এল। সবাই ভৃত্যশ্রেণীর। আজকালকার যুগেও যে এতজন কাজের লোক থাকতে পারে তা মিসির আলি ধারণা করেন নি। তিনি লক্ষ্য করলেন এরা কেউ তিন্মেয়েটির উল্লেখ করছে না। মেয়ের বাবাও মেয়ে সম্পর্কে কাউকে কিছু জিজ্ঞেস করলেন না। অথচ জিজ্ঞেস করাটাই স্বাভাবিক ছিল।

বরকত সাহেব বললেন, আপনি যান বিশ্রাম করুন। সকালবেলা আপনার সঙ্গে কথা হবে।

কালো মতো লম্বা একটি ছেলে তাঁর ঘর দেখিয়ে দিল।

একতলার একটি কামরা, পুরোনো দিনের কামরাগুলি যেমন হয়—দৈর্ঘ্যে প্রস্থে বিশাল। বিরাট দক্ষিণমুখী জানালা। ঘরের আসবাবপত্র সবই দামি ও আধুনিক। খাটে ছ-ইঞ্চি ফোমের তোশক। রকিং চেয়ার। মেঝেতে দামি স্যাগ কার্পেট। মফস্বল শহরে এসব জিনিস ঠিক আশা করা যায় না।

বাথরুমে ঢুকে মিসির আলি আরো অবাক হলেন। ওয়াটার হিটারের ব্যবস্থা আছে। চমৎকার বাথটাব। মিসির আলির মনে হল অনেকদিন এ ঘরে বা বাথরুমে কেউ আসে নি। এমন চমৎকার একটি গেস্টরুম এরা শুধু-শুধু বানিয়ে রেখেছে।

প্রচণ্ড ঠাণ্ডা। কিন্তু গরম পানির ব্যবস্থা যখন আছে তখন একটা হট শাওয়ার নেয়া যেতে পারে। মিসির আলি দীর্ঘ সময় নিয়ে গোসল সারলেন। শরীর ঝরঝরে লাগছে। এক কাপ গরম চা পেলে বেশ হত।

বাথরুম থেকে বের হয়েই দেখলেন টেবিলে চায়ের আয়োজন। পট ভর্তি চা, প্লেটে নোনতা বিসকিট, কুচিকুচি করে কাটা পনির। ভৃত্যশ্রেণীর একজন যুবক তাঁকে ঢুকতে দেখেই চা ঢালতে শুরু করল। তিনি লক্ষ্য করলেন লোকটি আড়চোখে তাঁর দিকে বারবার তাকাচ্ছে। চোখে চোখ পড়া মাত্র, চট করে মাথা নামিয়ে নিচ্ছে।

তোমার নাম কী?

নাজিম।

শুধু নাজিম?

নাজিমুদ্দিন।

কতদিন ধরে এ বাড়িতে আছ?

জুি অনেক দিন।

অনেক দিন মানে কত দিন?

পাঁচ বছর।

এ বাড়িতে কজন মানুষ থাকে?

নাজিম জবাব দিল না। চায়ের কাপে চিনি ঢেলে এগিয়ে দিল। তার ভাবভঙ্গি দেখে মনে হচ্ছে সে এখন চলে যাবে। মিসির আলি দ্বিতীয়বার জিজ্ঞেস করলেন, বাড়িতে কজন মানুষ থাকে?

জ্বি না স্যার আমি জানি না।

বরকত সাহেব এবং তার মেয়ে এই দুজন ছাড়া আর কজন মানুষ থাকে?

আমি স্যার কিছুই জানি না।

মিসির আলি বড়ই অবাক হলেন। আর কোনো প্রশ্ন করলেন না। চায়ে চুমুক দিলেন। সিগারেট ধরালেন। তিনি সিগারেট ছেড়ে দেবার চেষ্টা করছেন সেটা মনে রইল না। এই লোকটি কোনোকিছু বলতে চাচ্ছে না কেন? বাধা কোথায়?

নাজিম মৃদুস্বরে বলল, স্যার বিছানায় শুয়ে বিশ্রাম নিবেন?

না, আমি অসময়ে ঘুমুবে না।

সকালের নাস্তা দেওয়া হবে সাড়ে সাতটায়।

ঠিক আছে।

আসি স্যার, পাশের ঘরেই আছি। দরকার হলে কলিংবেল টিপবেন। দরজার কাছে কলিংবেল আছে।

তিনি মাথা নাড়লেন। কিছু বললেন না। ঘড়িতে বাজছে পাঁচটা পঁয়তাল্লিশ। আকাশ ফরসা হতে শুরু করেছে। তিনি বারান্দায় এসে দাঁড়ালেন। ব্রহ্মপুত্র নদী নিশ্চয়ই খুব কাছে। ভোরবেলা নদীর পাড় ধরে হাঁটতে ভালো লাগবে। এই শহরে এর আগে তিনি আসেন নি। অপরিচিত শহরে ঘুরে বেড়াতে চমৎকার লাগে।

গেট বন্ধ। গেটের পাশের খুপরি ঘরটায় দারোয়ান নিশ্চয়ই ঘুমুচ্ছে। মিসির আলি উঁচু গলায় ডাকলেন—দারোয়ান, দারোয়ান গেট খুলে দাও।

দারোয়ান বেরিয়ে এল কিন্তু গেট খুলল না। যেন সে কথা বুঝতে পারছে না।

গেট খুলে দাও, আমি বাইরে যাব।

গেট খোলা যাবে না।

খোলা যাবে না মানে? কেন যাবে না?

বড় সাহেবের হুকুম ছাড়া খোলা যাবে না।

তার মানে? কী বলছ তুমি? এটা কি জেলখানা নাকি?

দারোয়ান কোনো উত্তর না দিয়ে নিজের ঘরে ঢুকে গেল। যেন মিসির আলির সঙ্গে কথাবার্তা চালিয়ে যাবার ব্যাপারে তার কোনো আগ্রহ নেই।

তিনি দাঁড়িয়ে রইলেন একা-একা। তাঁর সামনে ভারী লোহার গেট। সমস্ত বাড়টিকে যে পাঁচিল ঘিরে রেখেছে তাও অনেকখানি উঁচু। সত্যি সত্যি জেলখানা জেলখানা ভাব। মিসির আলি আবার ডাকলেন—দারোয়ান দারোয়ান। কেউ বেরিয়ে এল না। ভোর সাতটা পর্যন্ত মিসির আলি বাড়ির সামনের বাগানে চিন্তিতমুখে ঘুরে বেড়ালেন। এই সময়ের মধ্যে তিনি একটি গুরুত্বপূর্ণ আবিষ্কার করলেন। এই বাড়িটি গাছগাছালিতে ভর্তি। কিন্তু কোনো গাছে পাখি ডাকছে না। শুধু যে ডাকছে না তাই নয়, কোনো গাছে পাখি বসে পর্যন্ত নেই! অথচ ভোরবেলার এই সময়টায় পাখির কিচির-মিচিরে কান ঝালাপালা হবার কথা। অথচ চারদিক কেমন নীরব। থমথমে।


স্যার আপনার নাস্তা দেয়া হয়েছে।

কোথায়?

দোতলায় ।

চল যাই ।

আমি যাব না ন্যার । আপনি একা একা যান । ঐ যে সিঁড়ি ।



মিসির আলি বললেন, কেমন আছ তিনি?

সিঁড়িতে পা রেখেই মিসির আলি থমকে দাঁড়ালেন । সিঁড়ির মাথায় একটি বালিকা দাঁড়িয়ে তীক্ষ্ণদৃষ্টিতে তাঁর দিকে তাকিয়ে আছে । মেয়েটি দারুণ রূপসী । মাথা ভর্তি কোঁকড়ানো চুল । টানা টানা চোখ । দেবী মূর্তির মতো কাটা-কাটা নাক মুখ । মেয়েটি দাঁড়িয়েও আছে মূর্তির মতো । একটুও নড়ছে না । চোখের দৃষ্টিও ফিরিয়ে নিচ্ছে না । মিসির আলি বললেন, কেমন আছ তিনি?

মেয়েটি মিষ্টি করে হেসে বলল, ভালো আছি । আপনি ভালো আছেন?

হ্যাঁ ভালোই আছি ।

আপনাকে গेट খুলে দেয় নি । তাই না?

মিসির আলি উপরে উঠতে উঠতে বললেন, দারোয়ান ব্যাটা বেশি সুবিধার না । কিছুতেই গेट খুলল না ।

দারোয়ান ভালোই। বাবার জন্য খুলে নি। বাবা গেট খুলতে নিষেধ করেছেন।

তাই নাকি?

হ্যাঁ। বাবার ধারণা গেট খুললেই আমি চলে যাব।

তুমি বুঝি শুধু চলে যেতে চাও?

না চাই না। কিন্তু বাবার ধারণা আমি চলে যেতে চাই।

মেয়েটি আবার মাথা দুলিয়ে হাসল। মেয়েটি এই দারুণ শীতেও পাতলা একটা জামা গায়ে দিয়ে আছে। খালি পা। মনে হচ্ছে সে শীতে অল্প-অল্প কাঁপছে।

তিনি তোমার শীত লাগছে না?

না।

বল কী! এই প্রচণ্ড শীত, তোমার ঠাণ্ডা লাগছে না?

না। আপনি নাস্তা খেতে যান। বাবা আপনার জন্যে অপেক্ষা করছে। দেরি হচ্ছে দেখে মনে মনে রেগে যাচ্ছে।

তাই বুঝি?

হ্যাঁ তাই।

মেয়েটি হাঁটতে শুরু করল। ধবধবে সাদা রঙের ফ্রকে তাকে দেবশিশুর মতো লাগছে। মিসির আলি মেয়েটির প্রতি গাঢ় মমতা বোধ করলেন। তার ইচ্ছে করল মেয়েটিকে কোলে তুলে নিতে। কিন্তু এ মেয়ে হয়তো এসব পছন্দ করবে না। একে দেখেই মনে হচ্ছে এর পছন্দ-অপছন্দ খুব তীব্র।

নাশতার আয়োজন প্রচুর।

রুটি মাখন থেকে শুরু করে চিকেন ফ্রাই ফিশ ফ্রাই সবই আছে। বিলেতি কায়দায় সবার সামনেই এক বাটি সালাদ। লম্বা লম্বা গ্লাসে কমলালেবুর রস। রাজকীয় ব্যাপার। শুধু খাবারদাবার এগিয়ে দেবার জন্যে কেউ নেই। বরকত সাহেব ঠাণ্ডা গলায় বললেন, বসে আছেন কেন? শুরু করুন।

তিনি জন্যে অপেক্ষা করছি।

ও আসবে না।

আসবে না কেন?

খেয়ে নিয়েছে। আমার মেয়ের সঙ্গে কি আপনার কথা হয়েছে?

হ্যাঁ।

কেমন দেখলেন আমার মেয়েকে?

ভালো।

বরকত সাহেব তীক্ষ্ণদৃষ্টিতে তাকিয়ে রইলেন খানিকক্ষণ! নিচুগলায় বললেন, ওর মধ্যে কি কোনো অস্বাভাবিকতা আপনার নজরে পড়েছে?

না।

ভালো করে ভেবে বলুন।

ভেবেই বলছি। তবে পারিপার্শ্বিক কিছু অস্বাভাবিক ব্যাপার লক্ষ্য করছি।

যেমন?

যেমন আপনার গাছগুলিতে কোনো পাখি নেই। একটি পাখিও আমার চোখে পড়ে নি।

বরকত সাহেব চমকালেন না। তার মানে তিনি ব্যাপারটি আগেই লক্ষ্য করেছেন। আগে লক্ষ্য না করলে নিশ্চয়ই চমকাতেন। অর্থাৎ মানুষটির পর্যবেক্ষণ শক্তি ভালো।

এই জিনিসটি চট করে কারোর চোখে পড়বে না। মিসির আলি বললেন, এ ছাড়াও অন্য একটি ব্যাপার লক্ষ্য করেছি।

বলুন শুন।

আপনার বাড়ির কাজের লোকটি যার নাম নাজিম সে অত্যন্ত ভীত ও শঙ্কিত। এটা এমন কিছু অস্বাভাবিক ব্যাপার নয়। এ বাড়ির সবাই আমাকে ভয় করে।

কেন?

পৃথিবীর নিয়মই হচ্ছে ক্ষমতাবানকে ভয় করা। আমি ক্ষমতাবান।

ক্ষমতাটা কিসের?

অর্থের। অর্থের ক্ষমতাই সবচেয়ে বড় ক্ষমতা।

আপনার ধারণা যেহেতু আপনার প্রচুর টাকা সেহেতু সবাই আপনাকে ভয় করে?

অন্য কারণও আছে। আমি বেশ বদমেজাজি।

আপনার মেয়ে তিন্নি, সেও কি বদমেজাজি?

বরকত সাহেবের ঙ্গ কুঁচকে উঠল। তিনি জবাব দিতে গিয়েও দিলেন না।

হালকাস্বরে বললেন, চা নিন। নাকি কফি খেতে চান?

চা খাব। আপনি বলেছিলেন ব্যবসা ছেড়ে দিয়েছেন। এখন করেন কী?

কিছুই করি না। এখন আমি ঘরেই থাকি।

এবং কাউকে ঘর থেকে বেরুতে দেন না।

এ কথা বলছেন কেন?

কারণ দারোয়ান আমাকে বেরুতে দেয় নি।

ওকে বলে দিয়েছি যেন গেট না খোলে।

কেন বলেছেন?

তিন্নির জন্যে বলেছি। আমার ভয় গেট খোলা পেলেই সে চলে যাবে। আমি আর কোনো দিন তাকে ফিরে পাব না।

সেকি এর আগে কখনো গিয়েছে?

না।

তাহলে কী করে আপনার ধারণা হল গেট খোলা পেলে সে চলে যাবে?

আমাকে আপনি এত প্রশ্ন করছেন কেন? আমাকে প্রশ্ন করবার জন্যে তো আপনাকে আনি নি। আপনাকে আনা হয়েছে আমার মেয়ের জন্যে।

আনা হয়েছে বলাটা বোধহয় ঠিক হচ্ছে না। আমি নিজ থেকে এসেছি।

বরকত সাহেব ক্লান্ত গলায় বললেন, আপনি দয়া করে আমার মেয়ের ঘরে চলে যান। ওর সঙ্গে কথা বলুন।

ও কি তার ঘরে একা থাকে?

হ্যাঁ, একাই থাকে।

মিসির আলি উঠে দাঁড়াতেই বরকত সাহেব বললেন, প্লিজ একটি কথা মন দিয়ে শুনুন। এমন কিছুই করবেন না যাতে আমার মেয়ে রেগে যায়।

এ কথা বলছেন কেন?

ও রেগে গেলে মানুষকে কষ্ট দেয়।

কীভাবে কষ্ট দেয়?

নিজেই বুঝবেন, আমার বলার দরকার হবে না।

তিনি'র ঘরটি বিরাট বড়। একপাশে ছোট্ট একটি কালো রঙের খাটে সুন্দর একটি বিছানা পাতা। নানান ধরনের খেলনায় ঘর ভর্তি। বেশিরভাগ খেলনাই হচ্ছে তুলার তৈরী জীবজন্তু। শিশুদের ঘর যেমন অগোছালো থাকে এ ঘরটি সে-রকম নয়। বেশ গোছানো ঘর। মিসির আলি দরজার বাইরে দাঁড়িয়ে কিছুক্ষণ তিনিকে দেখলেন। মেয়েটি গভীর মনোযোগে ছবি আঁকছে। একবারও তাকাচ্ছে না তার দিকে। মিসির আলি বললেন, তিনি ভেতরে আসব?

তিনি ছবি থেকে মুখ না তুলেই বলল, আসতে হচ্ছে হলে আসুন।

তিনি কিছু বলল না। মিসির আলি ভেতরে ঢুকলেন। হাসিমুখে বললেন, বসব কিছুক্ষণ তোমার ঘরে?

বসার হচ্ছে হলে বসুন।

তিনি বসলেন। হাসিমুখে বললেন, কিসের ছবি আঁকছ?

কিসের ছবি আঁকছ?

গাছের।

দেখি কেমন ছবি?

দেখতে হচ্ছে হলে দেখুন।

তিনি তার ছবি এগিয়ে দিল। মিসির আলি অবাক হয়ে দেখলেন—অদ্ভুত সব গাছের ছবি আঁকা হয়েছে। গাছগুলিতে কোনো পাতা নেই। অসংখ্য ডাল। ডালগুলি লতানো। কিছু কিছু লতা আবার চুলের বেণীর মতো পাকানো।

সুন্দর হয়েছে তো গাছের ছবি!

আপনার ভালো লাগছে?

হ্যাঁ।

এ রকম গাছ কি আপনি এর আগে কখনো দেখেছেন?

না দেখিনি।

তাহলে আপনি কেন জিজ্ঞেস করলেন না—কী করে আমি না-দেখে এমন সুন্দর গাছের ছবি আঁকলাম।

শিশুরা মন থেকে অনেক জিনিস আঁকে।

তিনি হাসল। তিনি প্রথম মেয়েটির মুখে হাসি দেখলেন। তিনি হাসতে হাসতে ভেঙে পড়ছে। মিসির আলি বললেন, তুমি এত হাসছ কেন?

হাসতে ভালো লাগছে তাই হাসছি।

তিনি নিজেও হাসলেন। হাসতে হাসতেই বললেন, আমি শুনেছি তুমি সব প্রশ্নের উত্তর জানো।

কে বলেছে? বাবা?

হ্যাঁ। তুমি কি সত্যিসত্যি জানো?

জানি। পরীক্ষা করতে চান?

হ্যাঁ চাই। বল তো নয়-এর বর্গমূল কত?

তিন।

পাঁচের বর্গমূল কত সেটা জানো?

তিনি কিছুক্ষণ চুপ করে থেকে বলল, আমি জানি না।

আচ্ছা দেখি এটা পার কি না। পেনিসিলিন যিনি আবিষ্কার করেছেন তাঁর নাম কী?

স্যার আলেকজান্ডার ফ্রেমিং।

হ্যাঁ হয়েছে। এখন বল দেখি তাঁর স্ত্রীর নাম কী?

আমি জানি না।

সত্যি জানো না?

না, আমি জানি না।

রবীন্দ্রনাথ ঠাকুর কত সনে নোবেল প্রাইজ পেয়েছেন জানো?

জানি। উনিশশো তের সনে।

রবীন্দ্রনাথ ঠাকুরের ছোট মেয়ের নাম জানো?

জানি না।

মিসির আলি হাসতে লাগলেন। তিনি ঙ্গ কুঁচকে তাকিয়ে রইল। গম্ভীরস্বরে বলল, আপনি হাসছেন কেন?

আমি হাসছি কারণ তুমি কীভাবে সব প্রশ্নের জবাব দাও তা বুঝতে পারছি।

তাহলে বলুন কীভাবে সব প্রশ্নের জবাব দেই।

আমি লক্ষ্য করলাম যেসব প্রশ্নের উত্তর আমি জানি শুধু সেসব প্রশ্নের উত্তরই তুমি জানো। যেমন আমি জানি নয়ের বর্গমূল তিন, কাজেই তুমি বললে তিন। কিন্তু পাঁচের বর্গমূল কত তা তুমি বলতে পারলে না। কারণ আমি নিজেও তা জানি না। আলেকজান্ডার ফ্রেমিংয়ের স্ত্রীর নাম তুমি বলতে পারলে না, কারণ আমি তাঁর স্ত্রীর নাম জানি না। ঠিক এই ভাবে

থাক আর বলতে হবে না।

তিনি তাকিয়ে আছে। তার মুখে কোনো হাসি নেই। সমস্ত চেহারায় কেমন একটা কঠিন ভাব চলে এসেছে। যা এত অল্পবয়সী একটি বাচ্চার চেহারার সঙ্গে ঠিক মিশ খাচ্ছে না। মিসির আলি সহজ স্বরে বললেন, তুমি মানুষের মনের কথা টের পাও। টের পাও বলেই জানা প্রশ্নগুলির উত্তর দিতে পার। এটা একধরনের টেলিপ্যাথিক ক্ষমতা। কেউ কেউ এধরনের ক্ষমতা নিয়ে জন্মায়।

তিনি শীতল গলায় বলল, আপনি খুব বুদ্ধিমান।

মিসির আলি বললেন, হ্যাঁ আমি বুদ্ধিমান।

আপনি বুদ্ধিমান এবং অহংকারী।

যারা বুদ্ধিমান তারা সাধারণত অহংকারী হয়। এটা দোষের নয়। যে জিনিস তোমার নেই তা নিয়ে তুমি যখন অহংকার কর সেটা হয় দোষের।

আপনি এখানে কেন এসেছেন?

তোমাকে সাহায্য করবার জন্যে এসেছি।

কিসের সাহায্য?

আমি এখনো ঠিক জানি না। সেটাই দেখতে এসেছি। হয়তো তোমার কোনো সাহায্যের প্রয়োজন নেই। তোমার বাবা শুধু-শুধু ভয় পাচ্ছেন।

আমি ডাক্তার পছন্দ করি না।

আমি ডাক্তার নই।

আপনি এখন আমার ঘর থেকে চলে যান। আমার আপনাকে ভালো লাগছে না।

আমার কিন্তু তোমাকে ভালো লাগছে। খুব ভালো লাগছে।

আপনি এখন যান।

মিসির আলি উঠে দাঁড়ালেন। তিনি বললেন, দাঁড়িয়ে আছেন কেন? চলে যান।

তিনি কথা ক'টি বলার সঙ্গে সঙ্গে মিসির আলি তাঁর মাথার ঠিক মাঝখানে এক ধরনের যন্ত্রণা বোধ করলেন। হঠাৎ মাথাটা ঘুরে উঠল। বমি-বমি ভাব হল, আর সেই সঙ্গে তীব্র ও তীক্ষ্ণ যন্ত্রণা। যেন কেউ একটি ধারালো ব্লেড দিয়ে আচমকা মাথাটা দু-ফাঁক করে ফেলেছে। মিসির আলি বুঝতে পারছেন তিনি জ্ঞান হারাচ্ছেন। পৃথিবী তার কাছ থেকে দূরে সরে যাচ্ছে। চোখের সামনে দেখছেন সাবানের বুদবুদের মতো বুদবুদ। জ্ঞান হারাবার ঠিক আগমুহূর্তে ব্যথাটা কমে গেল। সমস্ত শরীরে একধরনের অবসাদ। ঘুমে চোখ জড়িয়ে যাচ্ছে। মিসির আলি তাকালেন তিনি দিকে। মেয়েটির ঠোঁটের কোণে মৃদু হাসি। সহজ হাসি নয়, উপহাসের হাসি। মিসির আলি দীর্ঘ সময় চুপ থেকে বললেন, এটা তো তুমি ভালোই দেখালে।

তিনি বলল, এর চেয়েও ভালো দেখাতে পারি।

তা পার। নিশ্চয়ই পার। তুমি হিঁ রাগ হলেই এ-রকম কর?

হ্যাঁ করি।

আমি তোমাকে রাগাতে চাই না।

কেউ চায় না।

সবাই তোমাকে খুশি রাখতে চায়?

হ্যাঁ।

কিন্তু তবু তুমি প্রায়ই রেগে যাও তাই না?

হ্যাঁ যাই।

রাগটা সাধারণত কতক্ষণ থাকে?

ঠিক নেই। কখনো কখনো অনেক বেশি সময় থাকে।

আচ্ছা তিনি, মনে কর এখানে দুজন মানুষ আছে! তুমি রাগ করলে একজনের ওপর। তাহলে ব্যথাটা কি সেইজনই পাবে? না দুজন একত্রে পাবে?

যার ওপর রাগ করেছি সেই পাবে। অন্য পাবে কেন? অন্যজনের ওপর তো আমি রাগ করিনি।

তাওতো ঠিক। এখন কি আমার ওপর তোমার রাগ কমেছে?

হ্যাঁ কমেছে।

তাহলে আমার দিকে তাকিয়ে একটু হাসো তো যাতে আমি বুঝতে পারি তোমার রাগ সত্যি সত্যি কমেছে!

তিনি হাসল। মিসির আলি বললেন, আমি কি আরো খানিকক্ষণ বসব?

বসার ইচ্ছা হলে বসুন!

মিসির আলি বসলেন। একটি সিগারেট ধরালেন। মেয়েটি নিজের মনে ছবি আঁকছে। সেই গাছের ছবি, লতানো ডাল, পত্রহীন বিশাল বৃক্ষ। মিসির আলি ঠিক করলেন তিনি একটি পরীক্ষা করবেন। এই মেয়েটি যেভাবেই হোক মস্তিষ্কের কোষে সরাসরি চাপ প্রয়োগ করতে পারে। উচ্চপর্যায়ের একটি ট্যালিপেথিক ক্ষমতা। ছোট্ট একটি মেয়ে অথচ কত সহজে মানুষের মাথায় ঢুকে যাচ্ছে। এটাকে বাধা দেবার একমাত্র উপায় সম্ভবত মেয়েটিকে মাথার ভেতর ঢুকতে না-দেয়া। সেটা করা যাবে তখনই যখন নিজেকে সম্পূর্ণ বিচ্ছিন্ন করে ফেলা যাবে। সমস্ত চিন্তা ও ভাবনা কেন্দ্রীভূত করা হবে একটি বিন্দুতে।

মিসির আলি ডাকলেন, তিনি।

তিনি মুখ না তুলেই বলল, কী?

তুমি আমার মাথার ব্যাথাটা আবার তৈরী কর তো ।

কেন?

আমি একটা ছোট পরীক্ষা করব ।

কী পরীক্ষা?

আমি দেখতে চাই এই ব্যথার হাত থেকে বাঁচার কোনো উপায় আছে কি না ।

উপায় নেই ।

সেটাই দেখব । তবে তিন্মি একটি কথা, ব্যাথাটা তুমি তৈরী করবে খুব ধীরে । এবং যখনই আমি হাত তুলব তুমি ব্যাথাটা কমিয়ে ফেলবে ।

আপনি খুব অদ্ভুত মানুষ ।

আমি মোটেই অদ্ভুত মানুষ নই । আমি একজন যুক্তিবাদী মানুষ । আমি এসেছি তোমাকে সাহায্য করতে ।

আমার কোনো সাহায্য লাগবে না ।

হয়তো লাগবে না । তবু আমি তোমার ব্যাপারটা পুরোপুরি বুঝতে চাই । এখন তুমি ব্যাথা তৈরী করো তো । খুব ধীরে ধীরে ।

তিন্মি মাথা তুলে সোজা হয়ে বসল । তার দৃষ্টি তীক্ষ্ণ থেকে তীক্ষ্ণতর হচ্ছে । চোঁট বেঁকে যাচ্ছে । বাঁকা চোঁট খুব হালকাভাবে কাঁপছে ।

মিসির আলি চোখ বন্ধ করে বসে আছেন । তিনি তাঁর সমস্ত মনপ্রাণ একটি ব্যাপারে কেন্দ্রীভূত করে ফেললেন । খুব ছোটবেলায় তিনি একটি সাপের মুখোমুখি হয়েছিলেন । এখন তিনি ভাবছেন সেই সাপটির কথা । সাপটির হলুদ গা ছিল চক্ৰকাটা । বুকে ভর দিয়ে ঐক্যে ঐক্যে এসেছিল । তাঁকে দেখেই সে থমকে গেল । ঘন ঘন তার চেরা জিভ বের করতে লাগল । মিসির আলি এখন আর কিছুই ভাবছেন না । পৃথিবীতে ঠিক এইমুহূর্তে সাপের চেরা জিভ ছাড়া অন্যকিছুই নেই । তিনি জীবিত কি মৃত সেই বোধও তাঁর নেই । তিনি কল্পনায় দেখছেন হলুদ রঙের কুৎসিত সাপের চেরা জিভ বাতাসে কাঁপছে ।

মিসির আলির চোখের দৃষ্টি ঘোলা হয়ে আসছে । কপালে বিন্দু বিন্দু ঘাম । তিনি ঘন ঘন নিশ্বাস ফেলছেন । তিন্মি অবাক হয়ে মিসির আলিকে দেখছে । আশ্চর্য ব্যাপার, এই মানুষটিকে সে কিছু করতে পারছে না! এতক্ষণে ব্যথায় তাঁর ছটফট করা উচিত ছিল কিন্তু লোকটি এখনো হাত তুলছে না । এর মানে কি এই যে সে ব্যাথা পাচ্ছে না । তা কী করে সম্ভব? তিন্মি ব্যথার পরিমাণ অনেকদূর বাড়িয়ে দিল । তার নিজের মাথাই এখন ঝিমঝিম করছে । মিসির আলি হাত তুললেন । তিনি পরীক্ষায় পাশ করেছেন । মিসির আলি দুর্বল গলায় বললেন, তিন্মি আমি এখন যাই । তোমার সঙ্গে পরে কথা হবে ।

তিন্মি জবাব দিল না । অবাক-চোখে তাঁকে দেখতে লাগল ।

মিসির আলি বললেন, তিন্মি আমি কি তোমার আঁকা ছবিগুলি নিয়ে যেতে পারি?

কেন?


আমি নিজের ঘরে বসে সময় নিয়ে ছবিগুলি দেখব ।

তাতে কী হবে?

তোমাকে বুঝতে সুবিধা হবে ।

তিন্মি তাঁর হাতে একগাদা ছবি তুলে দিল । মিসির আলি সিঁড়ি বেয়ে নেমে গেলেন । ক্লান্তিতে তাঁর পা ভেঙে আসছে । ঘুমে চোখ জড়িয়ে আসছে । তিনি পেছনে ফিরলেন । তিন্মি ছাদে উঠে গেছে । তার মাথার উপর চক্ৰাকারে কয়েকটি পাখি উড়ছে ।

আশেপাশে পাখি নেই। কিন্তু এই মেয়েটির মাথার উপর পাখি উড়ছে কেন? শালিক পাখি। কিচমিচ শব্দ করছে। মেয়েটিকে দেখে মনে হল সেও কিছু বলছে পাখিদের। এত রহস্য কেন? মিসির আলি নিজের ঘরের দিকে এগুলেন। তার মন ভারাক্রান্ত। তিনি নিজের ভেতর একধরনের অস্থিরতা বোধ করলেন।



“মেয়েটির উপর চক্রাকারে পাখি উড়ছে।”



সারাটা দিন তিনি ছাদে কাটাল।

একবার এ-মাথায় যাচ্ছে, আরেকবার ও-মাথায়। মাঝে মাঝে বিড়বিড় করে নিজের মনে কথা বলছে এবং হাসছে। শীতের দিনের রোদ দুপুরের দিকে খুব বেড়ে যায়। সারা গা চিড়বিড় করে। কিন্তু মেয়েটি নির্বিকার। হাঁটছে তো হাঁটছেই। রহিমা দুপুরে ছাদে এসে ভয়ে ভয়ে বলেছিল—ভাত দিছি খেতে আসেন। তিনি কোনো কথা বলেনি। রহিমা খানিকক্ষণ দাঁড়িয়ে থেকে চলে গেছে। তিনি বুঝতে পারছে সিঁড়ি দিয়ে নামার সময় রহিমা মনে মনে বলছে—পিশাচ পিশাচ। মানুষ না পিশাচ। তিনি খানিকটা রাগ লাগছিল। কিন্তু সে সামলে নিল। সব সময় রাগ করতে ভালো লাগে না। তার নিজেরও কষ্ট হয়। চোখ জ্বালা করে।

রহিমার মা চলে যাবার পরপরই বরকত সাহেব এলেন। তিনি কোনো কথা বললেন না। চিলেকোঠার কাছে মাথা নিচু করে দাঁড়িয়ে রইলেন। তিনি মন খারাপ হয়ে গেল। বাবা আগে তাকে ভয় পেতেন না। এখন পান। খুবই ভয় পান। অথচ সে বাবাকে একদিনও ব্যথা দেয় নি। কোনোদিন দেবেও না।

তিনি।

কি বাবা?

ভাত খেতে আস।

আমার খিদে নেই বাবা। যেদিন খুব রোদ ওঠে সেদিন আমার খিদে হয় না।

বরকত সাহেব ছোট্ট একটি নিশ্বাস ফেললেন। সেই নিশ্বাসের শব্দ শুনে তিনি আরো মন খারাপ হয়ে গেল।

তিনি।

কি বাবা?

যে ভদ্রলোক এসেছেন তার সঙ্গে কি তোমার কথা হয়েছে?

হ্যাঁ হয়েছে।

তাকে তোমার কেমন লেগেছে?

ভালো।

তাহলে তাকে ব্যথা দিলে কেন? আমি কিছুক্ষণ আগে একতলায় গিয়েছিলাম। ভদ্রলোক মরার মতো পড়ে আছেন।

তিনি জবাব দিল না। বরকত সাহেব বললেন, তুমি জানো উনি কীজন্যে এসেছেন?

জানি। উনি আমাকে বলেছেন।

তুমি লক্ষী মেয়ের মতো তোমার যত কথা আছে সব উনাকে বলবে। কিছুই লুকোবে না।

আচ্ছা।

তোমার স্বপ্নের কথাও বলবে।

উনি বিশ্বাস করবেন না। হাসবেন।

না হাসবেন না। উনি একজন অত্যন্ত বুদ্ধিমান মানুষ। তোমার সব কথা উনি বুঝবেন। আমি যা বুঝতে পারিনি উনি তা পারবেন।

তিনি বলল, উনি কি গাছের মতো জ্ঞানী?

বরকত সাহেব মৃদুস্বরে বললেন, তোমার গাছের ব্যাপারটা আমি জানি না তিনি। কাজেই বলতে পারছি না গাছের মতো জ্ঞানী কি না। আমার ধারণা গাছের জীবন থাকলেও তা খুব নিম্নপর্যায়ের। জ্ঞানবুদ্ধির ব্যাপার সেখানে নেই।

বাবা!

বল মা।

আমার স্বপ্নের ব্যাপারটা কি আজই উনাকে বলব?

না, আজ না বললেও হবে। কাল বোলো। আজ ভদ্রলোক ঘুমুচ্ছেন। আমার মনে হয় সারাদিনই ঘুমুবেন! তুমি ব্যথা দেবার পর উনি অসুস্থ হয়ে পড়েছেন।

তিনি লজ্জিত হল। কিছু বলল না। বরকত সাহেব বললেন, তুমি কি ছাদেই থাকবে?

হ্যাঁ। তুমি যাও, ভাত খাও।

বরকত সাহেব নেমে গেলেন। তিনি ছাদের এ-মাথা থেকে ও-মাথা পর্যন্ত আবার হাঁটতে শুরু করল। সে নেমে এল সন্ধ্যাবেলায়। তার গা ঝিমঝিম করছে। হাত-পা কাঁপছে। আজ সে আবার স্বপ্ন দেখবে। এসব লক্ষণ তার এখন চেনা হয়ে গেছে। তার ভয়-ভয় করতে লাগল। স্বপ্ন এত বাজে ব্যাপার, এত কষ্টের!

ঘুমুবার আগে তিনি একবাটি দুধ খেল। রহিমা কমলা এনেছিল খোসা ছড়িয়ে। তার দুটি কোয়া মুখে দিল। রহিমা বলল, আমি এই ঘরে ঘুমাইব আপা? তিনি কড়া গলায় বলল, 'না'। রহিমা প্রতি রাতেই এই কথা বলে। প্রতি রাতেই তিনি একই উত্তর দেয়। একা-থাকা তার অভ্যেস হয়ে গেছে। অথচ কেউ সেটা বুঝতে চায় না। বাবাও মাঝে মাঝে এসে বলেন, তুমি কি আমার সঙ্গে ঘুমুবে মা?

একবার খুব ঝড় বৃষ্টি হচ্ছিল। ঘন ঘন বাজ চমকচ্ছিল। বাবা এসে জোর করে তাকে উঠিয়ে নিয়ে গিয়েছিলেন। সে কতবার বলেছে— আমি কাউকেই ভয় করি না। বাবা শুনে নি। বাবা-মা'রা কোনো কথা শুনে চায় না। মা'র কথা সে অবশ্যি বলতে পারে না, কারণ মা'র কথা তার কিছুই মনে নেই। শুধু মনে আছে মাথা-ভর্তি চুলের একটি গোলগাল মুখ তার মুখের ওপর ঝুঁকে আছে। তিনি ভাবতে লাগল— মা বেঁচে থাকলে এখন কী করত? তাকে নিয়ে খুব সমস্যায় পড়ে যেত। হয়তো রোজ রাতে তার সঙ্গে ঘুমুত। কান্নাকাটি করত। আচ্ছা সে এ-রকম হল কেন? সে অন্যসব মেয়েদের মতো হল না কেন?

রহিমা এখনো দাঁড়িয়ে আছে। সরাসরি তিনি দিকে তাকাচ্ছে না। কিন্তু মনে মনে চাচ্ছে তাড়াতাড়ি এ-ঘর থেকে চলে যেতে। তিনি ভেবে পেল না— যে চলে যেতে চাচ্ছে সে চলে না-গিয়ে দাঁড়িয়ে আছে কেন?

রহিমা।

জি আপা।

তুমি আজ সকালে আমাকে পিশাচ ডাকছিলে কেন ?

রহিমার মুখ সাদা হয়ে গেল । দেখতে দেখতে তার কপালে বিন্দুবিন্দু ঘাম জমল ।

পিশাচরা কী করে রহিমা?

রহিমা তার জবাব দিল না । তার পানির পিপাসা পেয়ে গেছে । বুক শুকিয়ে কাঠ ।

আর কোনো দিন আমাকে পিশাচ ডাকবে না ।

জি আচ্ছা ।

এখন যাও ।

আজ বোধ হয় স্বপ্নটা সে দেখবেই । বিছানায় শোয়া মাত্র চোখ জড়িয়ে আসছে ঘুমে । অনেক চেষ্টা করেও চোখ মেলে রাখা যাচ্ছে না । ঘরের বাতাস হঠাৎ যেন অনেকখানি ঠাণ্ডা হয়ে গেছে । বুনবুন শব্দ হচ্ছে দূরে । এই দূর অনেকখানি দূর । গ্রহ-নক্ষত্র ছাড়িয়ে দূরে আরো দূরে । তিনি ছটফট করতে লাগল । সে ঘুমুতে চায় না । জেগে থাকতে চায় । কিন্তু ওরা তাকে জেগে থাকতে দেবে না । ঘুম পাড়িয়ে দেবে । এবং ঘুম পাড়িয়ে অদ্ভুত সব স্বপ্ন দেখাবে ।

তিনি সেই রাতে যে স্বপ্ন দেখল তা অনেকটা এ-রকম

একটি বিশাল মাঠে সে দাঁড়িয়ে আছে । যতদূর দৃষ্টি যায় শুধু গাছ আর গাছ । বিশাল মহীরুহ । এইসব গাছের মাথা যেন আকাশ স্পর্শ করেছে । গাছগুলি অদ্ভুত । লতানো ডাল । কিছু কিছু ডাল আবার বেণী পাকানো । তাদের গায়ের রঙ সবুজ নয়, হলুদের সঙ্গে লাল মেশানো । হালকা লাল । এইসব গাছ একসঙ্গে হঠাৎ কথা বলে উঠছে । নিজেদের মধ্যে কথা । আবার কথা বন্ধ করে দিচ্ছে । তখন চারদিকে সুনসান নীরবতা । শোনা যাচ্ছে শুধু বাতাসের শব্দ । ঝড়ের মতো শব্দে বাতাস বইছে । আবার সেই শব্দ থেমে যাচ্ছে । তখন কথা বলছে গাছেরা । কত অদ্ভুত বিষয় নিয়ে কত অদ্ভুত কথা । তার প্রায় কিছুই তিনি বুঝতে পারছে না । একসময় সমস্ত কথাবার্তা থেমে গেল । তিনি বুঝতে পালল সব কটি গাছ লক্ষ্য করেছে তাকে । তাদের মধ্যে একজন বলল, কেমন আছ ছোট্ট মেয়ে ?

ভালো ।

ভয় পাচ্ছ কেন তুমি ?

আমি ভয় পাচ্ছি না ।

অল্প অল্প পাচ্ছ । কোনো ভয় নেই ।

‘কোনো ভয় নেই’ বলার সঙ্গে সঙ্গে সব কটি গাছ একত্রে বলতে লাগল, ভয় নেই । কোনো ভয় নেই ।

ভয়াবহ শব্দ । কানে তালা লেগে যাবার মতো অবস্থা! তিনি তখন কেঁদে ফেলল, তার কান্নার সঙ্গে সঙ্গে সমস্ত শব্দ থেমে গেল । কথা বলল শুধু একটি গাছ ।

ছোট্ট মেয়ে তিনি ।

কী ?

কাঁদছ কেন ?

জানি না কেন । আমার কান্না পাচ্ছে ।

ভয় লাগছে ?

হ্যাঁ ।

কোনো ভয় নেই । তোমাকে ঘুম পাড়িয়ে দিচ্ছি ।

কথা শেষ হবার সঙ্গে আলো কমে এল । সব কটি গাছ একত্রে মাথা দুলিয়ে কী সব গান করতে লাগল । এই গানে মনে অদ্ভুত এক আনন্দ হয় । শুধু মনে হয় কত সুখ চারদিকে । শুধু বেঁচে থাকতে ইচ্ছে করে । আনন্দ করতে ইচ্ছা করে ।

ঘুম আসছে ছোট মেয়ে তিন্নি ?

আসছে ।

তাহলে ঘুমাও । আমাদের গান তোমার ভালো লাগছে ?

লাগছে ।

খুব ভালো ?

হ্যাঁ খুব ভালো ।

গাঢ় ঘুমে তিন্নির চোখ জড়িয়ে এল । স্বপ্ন শেষ হয়েছে । কিন্তু শেষ হয়েও যেন হয় নি । তার রেশ লেগে আছে তিন্নির চোখমুখে ।



মিসির আলি সারাদিন ঘুমুলেন।

দুপুরে একবার ঘুম ভেঙেছিল। মাথায় অসহ্য যন্ত্রণা। তিনি পরপর দু'গ্লাস ঠাণ্ডা পানি খেয়ে আবার বিছানায় গড়িয়ে পড়লেন। যখন জাগলেন তখন বেশ রাত। বিছানার পাশে উদ্দিগ্ন-মুখে বরকত সাহেব দাঁড়িয়ে আছেন। একজন বেঁটে মতো লোক আছে, হাতে স্টেথিসকোপ। নিশ্চয়ই ডাক্তার। দরজার পাশে চোখ বড় বড় করে দাঁড়িয়ে নাজিম। বোঝাই যাচ্ছে সে বেশ ভয় পেয়েছে।

বরকত সাহেব বললেন, এখন কেমন লাগছে?

ভালো।

মিসির আলি উঠতে চেষ্টা করলেন। ডাক্তার সাহেব বললেন, নড়াচড়া করবেন না। চুপ করে শুয়ে থাকুন। আপনার ব্লাডপ্রেসার এমনরম্যালি হাই।

তিনি কিছু বললেন না। নিজেকে খাপ খাইয়ে নিতে তাঁর সময় লাগছে। ঘুমঘুম ভাবটা ঠিক কাটছে না। ডাক্তার সাহেব বললেন, হাই প্রেশারে কতদিন ধরে ভুগছেন?

প্রেশার ছিল না। হঠাৎ করে হয়েছে। যে জিনিস হঠাৎ আসে তা হঠাৎ যায়। কি বলেন?

না না, খুব সাবধান থাকবেন। আমি তো ভয়ই পেয়ে গিয়েছিলাম। বরকত সাহেবকে বলছিলাম হাসপাতালে ট্রান্সফার করবার জন্যে। সত্যি করে বলুন এখন কি বেটার লাগছে?

লাগছে। আগের মতো খারাপ লাগছে না।

ডাক্তার গম্ভীর ভঙ্গিতে মাথা নাড়তে নাড়তে বললেন, হঠাৎ করে এ-রকম হাই প্রেশার হবার তো কথা নয়। খুব আনইউজুয়াল।

তিনি একগাদা অমুখপত্র দিলেন। যাবার সময় বার বার বললেন, রেস্ট দরকার। কমপ্লিট রেস্ট। কিছু খাওয়া-দাওয়া করে শুয়ে পড়ুন। একটা ঘুমের অমুখ দিয়েছি। খেয়ে টানা ঘুম দিন। ভোরে এসে আমি আবার প্রেশার মাপব।

বরকত সাহেব বললেন, আপনি তো সারাদিন কিছু খাননি।

এখন খাব। গোসল সেরে খেতে বসব। প্রচণ্ড খিদে পেয়েছে। আপনি কি দয়া করে খাবারটা আমার ঘরে পাঠাবার ব্যবস্থা করবেন?

নিশ্চয়ই করব। আপনার সঙ্গে আমি কিছু কথা বলতে চেয়েছিলাম।

মিসির আলি বললেন, আজ না, আমি আগামীকাল কথা বলব।

ঠিক আছে। আগামীকাল।

বরকত সাহেব ঘর থেকে বেরুতে গিয়েও থমকে দাঁড়ালেন। নিচুগলায় বললেন, আপনার কষ্ট হল খুব। আমি লজ্জিত।

আপনার লজ্জিত হবার কিছুই নেই। আপনি এ নিয়ে ভাববেন না।

দীর্ঘ স্নানের পর মিসির সাহেবের বেশ ভালোই লাগল। ক্লান্তির ভাব নেই। মাথায় সূক্ষ্ম যন্ত্রণা আছে তবে তা সহনীয়। এবং মনে হচ্ছে গরম এক কাপ চা খেলে সেরে যাবে।

খাবার নিয়ে এল নাজিম। মিসির আলি লক্ষ্য করলেন নাজিম তাকে বারবার আড়চোখে দেখছে। তার চোখে সীমাহীন কৌতূহল। সম্ভবত সে কিছু বলতে চায়। সাহস পাচ্ছে না। মিসির আলি ভারী গলায় ডাকলেন, নাজিম!

জি স্যার।

তুমি কেমন আছ?

জি স্যার ভালো।

তিনি তোমাকে কখনো মাথাব্যথা দেয় নি?

নাজিম চমকে উঠল। কিন্তু নিজেকে সামলে নিল। সহজভাবে ভাত তরকারি এগিয়ে দিতে লাগল।

কথা বলছ না কেন নাজিম?

কী বলব স্যার?

ঐ যে জিজ্ঞেস করলাম— তিনি তোমাকে মাথাব্যথা দেয় কি না। আমার ধারণা সবাইকেই মাঝে মাঝে দেয়। ঠিক বলছি না?

জি স্যার ঠিক বলেছেন।

তোমাকেও দিয়েছে?

জি স্যার।

ক'বার দিয়েছে?

অনেকবার।

তবু তুমি এ বাড়িতে পড়ে আছ কেন? চলে যাচ্ছ না কেন?

নিজাম জবাব দিল না। মিসির আলি বললেন, আমি ওর অসুখ ভালো করার জন্যে এসেছি। কাজেই ওর সম্পর্কে সবকিছু আমার জানা দরকার। তোমরা যদি না বল তাহলে আমি জানব কী করে?

কী জানতে চান স্যার?

মানুষকে কষ্ট দেবার এই ব্যাপারটা ও কবে থেকে শুরু করেছে?

তিন বছর ধরে হচ্ছে।

প্রথম কীভাবে এটা শুরু হল তোমার মনে আছে?

জি আছে। রহিমা, তিনি আপার জন্যে দুধ নিয়ে গিয়েছিল। তিনি আপা খাচ্ছিল না। তখন রাগের মাথায় রহিমা তিনি আপাকে একটা চড় দেয়। তারপরই শুরু হয়— রহিমা চিৎকার করতে থাকে। গড়াগড়ি করতে থাকে। ভয়ঙ্কর কষ্ট পায়।

রহিমা কি এখনো কাজ করে এ বাড়িতে?

জি।

এ-রকম কষ্ট কি সে আরো পেয়েছে?

জি স্যার।

তবু সে এ বাড়িতে পড়ে আছে? চলে যায় না কেন?

নিজাম জবাব দিল না। মিসির আলি লক্ষ্য করলেন এই প্রশ্নটির জবাব নাজিম এড়িয়ে যাচ্ছে। এত কষ্টের পরও কাজের মানুষগুলি এখানেই আছে। তার কী কারণ হতে পারে? হয়তো অনেক বেশি বেতন দেয়া হচ্ছে যে কারণে থাকছে। কিন্তু এটা বলতে কোনো আপত্তি থাকার কথা নয়।

তুমি বেতন কত পাও নাজিম?

জি মাসে দেড়শ টাকা আর কাপড়চোপড়।

মিসির আলির মনে হল এটা এমন কোনো বেশি বেতন নয়। কাজেই এরা যে এখানে পড়ে আছে নিশ্চয়ই তার কারণ অন্য।

নিজাম!

জি স্যার।

তুমি কি আমাকে চা খাওয়াতে পার?

নিয়ে আসছি স্যার।

আর শোনো রহিমার সঙ্গে আমি কথা বলতে চাই। ওকে পেলে বলবে আমার কথা।

জি আচ্ছা।

নিজাম চট করে চা নিয়ে এল। লোকটি করিৎকর্মা। চা-টা হয়েছেও চমৎকার।

চুমুক দিতে দিতেই মাথার যন্ত্রণা প্রায় সেরে গেল।

চিনি লাগবে স্যার?

না লাগবে না। খুব ভালো চা হয়েছে নাজিম। বসো টুলটায় বসো, কথা বলি।

নিজাম বসল না। জড়সড় হয়ে দাঁড়িয়ে রইল। মিসির আলি বললেন, তিন্মির মধ্যে আর কী অস্বাভাবিক ব্যাপার তুমি লক্ষ্য করেছ?

নিজাম মাথা চুলকাতে লাগল। মিসির সাহেব বললেন, ভালো করে চিন্তা করে বসো। সে এমন কিছু কি করে যা আমরা সাধারণত করি না?

তিনি আপা রোদের মধ্যে বসে থাকতে ভালোবাসেন।

তাই নাকি?

জি স্যার। জ্যেষ্ঠ মাসের রোদেও তিনি আপা সারাদিন ছাদে বসে থাকেন।

এ ছাড়া আর কী করে?

আর কিছু না।

মনে করতে চেষ্টা কর। হয়তো কোনো ছোট ব্যাপার। তোমার কাছে হয়েছে। এর কোনো মূল্যই নেই কিন্তু আমার কাছে তা গুরুত্বপূর্ণ হতে পারে। বুঝতে পারছ আমার কথা?


জি স্যার।

রাত একটার দিকে মিসির আলি তিন্মির আঁকা ছবিগুলি নিয়ে বসলেন। সব মিলিয়ে পাঁচটি ছবি। প্রতিটি ছবিই গাছ বা গাছ জাতীয় কিছু। বেশির ভাগ গাছ লতানো। গাছের রঙ হলুদ থেকে লালের মধ্যে। সবুজের কিছুমাত্র ছোঁয়া নেই। তিনি হলুদ এবং লাল রঙ দিয়ে ছবি আঁকল কেন? সম্ভবত তাঁর কাছে সবুজ রঙ ছিল না। অবশ্যি শিশুরা অদ্ভুত রঙ ব্যবহার করতে ভালোবাসে। তাঁর এক ভাগ্নি মানুষ আঁকে আকাশী নীল রঙে। মানুষের চোখে দেয় গাঢ় লাল রঙ।

অবশ্যি এই পাঁচটি ছবি শিশুর আঁকা ছবি বলে মনে হচ্ছে না। শিশুরা এত চমৎকার আঁকে না। একটি ছবিতে দেখা যাচ্ছে ঝড় হচ্ছে। প্রচণ্ড ঝড়। কোনো শিশু, তা সে যত প্রতিভাবান শিশুই হোক এ-রকম নিখুঁত ঝড়ের ছবি আঁকতে পারবে না।

ছবি দেখে মনে হয় ঝড়ের সময়টায় এই ছবির শিল্পী উপস্থিত ছিল। হাওয়ার যে ঘূর্ণি উঠেছে তাও সে লক্ষ্য করেছে। মিসির আলি সাহেব মনে মনে একটি থিওরি দাঁড়া করাতে চেষ্টা করলেন। তিনি ভাবতে চেষ্টা করলেন ছবিগুলি কোনো শিশুর মনগড়া ছবি নয়, কল্পনার ছবি নয়। এই গাছ, এই ঝড়, বাতাসের এই ঘূর্ণি ছবির শিল্পী দেখেছে।

যদি তাই নয় তাহলে এ গাছগুলি কি পৃথিবীর? পৃথিবীর গাছে সবুজ রঙ থাকবে। ছায়াতে জন্মানো কিছুকিছু হলুদ গাছ তিনি দেখেছেন কিন্তু এ-রকম কড়া সূর্যের আলোয় হলুদ গাছ তিনি দেখেছেন বলে মনে করতে পারলেন না।



ছবিতে দু'টি সূর্য

প্রতিটি ছবিতে দুটি সূর্য। গনগনে সূর্য। এর মানে কী? পৃথিবীর কোনো ছবিতে দুটি সূর্য থাকবে না। তাহলে কি এই থিওরি দাঁড়া করানো যায় যে ছবিতে যে-দৃশ্য দেখা যাচ্ছে তা অন্য কোনো গ্রহের? তা কেমন করে হয়?

তিনি অন্য কোনো গ্রহের মেয়ে—এই যুক্তি হাস্যকর। তিনি পৃথিবীরই মেয়ে। এতে কোনো সন্দেহ থাকার অবকাশ নেই। এই গ্রহের মেয়ে হয়ে বাইরের একটি গ্রহের ছবি সে কেন আঁকছে? কীভাবে আঁকছে?

মিসির আলি গম্ভীরমুখে দ্বিতীয় সিগারেটটি ধরালেন। সব কেমন জট পাকিয়ে যাচ্ছে। এলোমেলো হয়ে যাচ্ছে। ছকে ফেলা যাচ্ছে না।

তিনি সিগারেট টানতে টানতে বারান্দায় এসে দাঁড়ালেন এবং ভাবতে চেষ্টা করলেন এইসব অল্পবয়সী একটি মেয়ের কল্পনার ছবি। এর বেশি কিছু নয়। মেয়েটির কল্পনা শক্তি খুব উচ্চপর্যায়ের, যার জন্যে সে এত চমৎকার কিছু ছবি আঁকতে পারছে। ভোরবেলায় তাকে জিজ্ঞেস করতে হবে।

মিসির আলির ঠাণ্ডা লাগছে। হু হু করে বইছে উত্তরী হাওয়া। কিন্তু এই ঠাণ্ডায় দাঁড়িয়ে থাকতে বেশ লাগছে। চারদিক খুব চুপচাপ। আকাশে চাঁদ থাকায় চমৎকার জোছনা হয়েছে। গাছের পাতার ফাঁক দিয়ে জোছনা ভেঙে-ভেঙে পড়ছে। কী অপূর্ব একটি দৃশ্য। মিসির আলি নিজের অজান্তেই হাঁটতে হাঁটতে একটি ঝাঁকড়া জামগাছের নিচে গিয়ে দাঁড়ালেন। ঠিক তখন অদ্ভুত একটা ব্যাপার হল। তিনি স্পষ্ট শুনলেন তিনি বলছে—‘কি আপনার ঘুম আসছে না?’ তিনি আশেপাশে কাউকেই দেখলেন না।

দেখার কথাও নয়। এই নিশিরাত্রিতে তিনি নিশ্চয়ই নিচে নেমে আসে নি। তিনি বললেন—কে ? কে কথা বলল ?

মিসির আলি খিলখিল হাসির শব্দ শুনলেন। এর মানে কী ? তিনিই হাসি কোথেকে ভেসে এসেছে ? মিসির আলি বললেন, তুমি তিনি ?

হ্যাঁ।

কোথেকে কথা বলছ ?

আপনি এত বুদ্ধিমান অথচ কোথেকে কথা বলছি বুঝতে পারছেন না ?

না বুঝতে পারছি না। তুমি কোথায় ?

আমি আমার ঘরেই আছি। কোথায় থাকব ?

মিসির আলি একটা বড় ধরনের চমক পেলে। মেয়েটি তার ঘর থেকেই কথা বলছে। সেইসব কথা তিনি পরিস্কার শুনছেন। ট্যালিপ্যাথিক যোগাযোগ। অদ্ভুত তো।

মেয়েটিও নিশ্চয়ই তাঁর কথা শুনতে পাচ্ছে, মেয়েটির সঙ্গে কথা বলার জন্যে নিশ্চয়ই চেষ্টা করে না। মনে মনে ভাবলেই তিনি বুঝবে। মিসির আলি কথা বলা শুরু করলেন।

মিসির আলি কেমন আছ তিনি ?

তিনি : ভালো।

মিসির আলি এখনো জেগে আছ ?

তিনি : হ্যাঁ আছি।

মিসির আলি কেন ?

তিনি : আমারও আপনার মতো ঘুম আসছে না।

মিসির আলি রোজই জেগে থাক ?

তিনি : মাঝে মাঝে থাকি।

মিসির আলি তোমার ছবিগুলি বসে বসে দেখলাম।

তিনি : আমি জানি।

মিসির আলি : খুব সুন্দর হয়েছে।

তিনি : তাও জানি।

মিসির আলি : এগুলি কোথাকার ছবি ?

তিনি : বলব না।

মিসির আলি : কেন বলতে অসুবিধা কী ?

তিনি : বলতে ইচ্ছা হচ্ছে না।

মিসির আলি : ছবিতে দেখলাম দুটি সূর্য।

তিনি : হ্যাঁ দুটি।

মিসির আলি : দুটি কেন ?

তিনি : দুটি থাকলে আমি কী করব ? একটি আঁকব ?

কথাবার্তা এই পর্যন্তই। মিসির আলি অনেকক্ষণ দাঁড়িয়ে রইলেন। কিন্তু আর কোনো যোগাযোগ হল না। তিনি বেশ কয়েকবার ডাকলেন, তিনি তিনি। কোনো জবাব নেই।

মিসির আলি নিজের বিছানায় ফিরে এলেন। ঘুম চলে গিয়েছে। শুয়ে থাকার কোনো মানে হয় না। তিনি আবার ছবি নিয়ে বসলেন। যদি নতুন কিছু বের হয়ে আসে। যে মাটির উপর গাছগুলি দাঁড়িয়ে আছে তার রঙ কী ? আকাশের রঙ কী ? গাছপালার ফাঁকে কোনো কীটপতঙ্গ আছে কি ? যদি থাকে তাদের রঙ কী ?

আপনি এখনো জেগে আছেন ?

তিনি চমকে উঠলেন। তিনি আবার কথা বলা শুরু করেছে।

হ্যাঁ এখনো জেগে আছি। তোমার ছবি দেখছি।

কেন দেখছেন? একবার দেখাও যা একশবার দেখাও তা।

উহঁ তুমি ঠিক বললে না। প্রথমবার অনেক কিছু চোখে পড়ে না।

আপনি ঘুমিয়ে পড়ুন।

ঘুম আসছে না।

আমি কিন্তু আপনাকে ঘুম পাড়িয়ে দিতে পারি।

পার নাকি?

হ্যাঁ পারি। দেব?

না তার দরকার নেই। তোমার সাথে কথা বলতে ভালো লাগছে।

তাহলে কথা বলুন।

আমার সঙ্গে তুমি যেভাবে কথা বলছ অন্যদের সঙ্গেও কি সেইভাবে কথা বল?

না।

কেন বল না?

বলতে ইচ্ছে করে না।

মিসির আলি চেষ্টা করতে লাগলেন আজেবাজে প্রশ্নের ফাঁকে ফাঁকে দু-একটি জরুরি প্রশ্ন করে খবরাখবর বের করে আনার। কিন্তু মেয়েটি খুব সাবধানী। সে অনায়াসে ফাঁদ কেটে বেরিয়ে যাচ্ছে। তবু এর মধ্যে একটি হচ্ছে—তিনি শুধু মানুষ নয় পশুদের সঙ্গেও (যেমন বিড়াল) যোগাযোগ করতে পারে। মিসির আলি জিজ্ঞেস করলেন, বিড়াল তোমার কথা বুঝতে পারে?

হঁ পারে।

তুমি ওর কথা বুঝতে পার?

বিড়াল কোনো কথা বলে না। তবে সে যা ভাবে তা বুঝতে পারি। অবশ্যি সব সময় পারি না।

কখন কখন পার?

তা জেনে আপনি কী করবেন? আপনি কি বিড়াল?

তিনি খিলখিল করে হাসতে লাগল। মিসির আলি রোমাঞ্চ বোধ করলেন। মেয়েটি নিজের ঘরে বসে হাসছে অথচ তিনি কী স্পষ্ট শুনতে পাচ্ছেন।

তিনি!

বলুন।

এই যে তুমি কথা বলছ আমি শুনছি; আচ্ছা এ বাড়িতে অন্য যারা আছে তা কি শুনছে?

তারা শুনবে কীভাবে, আমি কি তাদের সঙ্গে কথা বলছি?

তাওতো ঠিক।

আচ্ছা ধরো কাল ভোরে আমি যদি অনেকদূরে চলে যাই। তিন-চার মাইল দূরে কিংবা তারচেয়েও দূরে, তখনো কি তুমি আমার কথা শুনতে পারবে?

তিনি বিরক্ত হয়ে বলল, আপনার সঙ্গে আর কথা বলতে ইচ্ছা করছে না। আমি আর কথা বলব না।

মিসির আলি বললেন, শুভরাত্রি তিনি। তার কোনো জবাব তিনি শুনতে পেলেন না। মাথার যন্ত্রণাটা আবার ফিরে এসেছে। শরীরটা হালকা লাগছে। মিসির আলি ডাক্তারের দিয়ে যাওয়া ঘুমের ট্যাবলেট খেয়ে ঘুমুতে গেলেন। ভালো ঘুম হল না। আজেবাজে স্বপ্ন দেখলেন। বেশ কয়েকবার ঘুম ভেঙেও গেল।



শীতের ভোরবেলায় ময়মনসিংহ শহর মিসির আলির বেশ লাগল। তিনি অন্ধকার থাকতেই জেগে উঠেছেন। একটা উলের চাদর গায়ে দিয়ে শহর দেখতে বের হয়েছেন। আজ আর দারোয়ান তাঁকে বাধা দেয়নি। গেট খুলে দিয়েছে এবং হাসিমুখে বলেছে— এত সকালেই কই যান? সম্ভবত বরকত সাহেব দারোয়ানকে কিছু বলেছেন।

সব মফস্বল শহর দেখতে একরকম তবু এই শহরটি ব্রহ্মপুত্র নদীর জন্যেই বোধ হয় একটু আলাদা। কিংবা কে জানে ভোরবেলার আলোর জন্যেই হয়তো এ-রকম লাগছে। মিসির আলি হেঁটে নদীর পাড়ে চলে গেলেন। নদী শুকিয়ে এতটুকু হয়েছে। চিনির মতো সাদা বালির চর পড়েছে। অদ্ভুত লাগছে দেখতে। মর্নিং ওয়াকে বের হয়েছে এ-রকম বেশ কয়েকটি দল পাওয়া গেল। সবই বুড়োর দল। জীবনের শেষপ্রান্তে এসে হঠাৎ শরীরের জন্যে তাদের মমতা জেগে উঠেছে। এইসব অপূর্ব দৃশ্য আরো কিছুদিন দেখতে হলে শরীরটাকে বাঁচিয়ে রাখতে হবে।

মিসির আলি নদীর পাড় ধরে দ্রুত হাঁটতে লাগলেন। তাঁকে দেখে মনে হচ্ছে তাঁর মনে কোনো উদ্দেশ্য আছে। তিনি কিছু একটা করতে চান। কিন্তু তাঁর মনে কোনো গোপন উদ্দেশ্য ছিল না। ভোরবেলায় নদীর পাড়ের একটি ছোট শহর দেখতে ভালো লাগছে এই যা। মাইল দু-এক হাঁটার পর খানিকটা ক্লান্তি বোধ করলেন। বয়স হয়ে যাচ্ছে। এখন আর আগের মতো পরিশ্রম করতে পারেন না।

ঘড়িতে ছটা বাজছে। এখন উল্টোপথে হাঁটা শুরু করা দরকার। বরকত সাহেব নিশ্চয়ই ভোরের নাশতা নিয়ে অপেক্ষা করছেন।

একটা খেয়াঘাট দেখা যাচ্ছে। খেয়াঘাটের পাশে বেঞ্চি পেতে সুন্দর একটা চায়ের দোকান। মিসির আলি বেঞ্চিতে বসে চায়ের কথা বললেন। সিগারেট খাবার ইচ্ছা হচ্ছে। কিন্তু প্যাকেট ফেলে এসেছেন। চা শেষ করবার পর লক্ষ্য করলেন শুধু সিগারেট নয় মানিব্যাগও ফেলে এসেছেন। তাঁর অস্বস্তির সীমা রইল না। তিনি প্রায় ফিসফিস করে বললেন, আগামীকাল ভোরবেলায় চায়ের পয়সা দিয়ে যাব! আমি ভুলে মানিব্যাগ ফেলে এসেছি। আপনি কিছু মনে করবেন না।

চায়ের দোকানি দাঁত বের করে হাসল। যেন খুব মজার একটা কথা শুনছে।

কোনো অসুবিধা নাই। দরকার হইলে আরেক কাপ খান।

মিসির আলি সত্যি সত্যি আরেক কাপ চা খেলেন। অল্প অল্প রোদ উঠেছে। রোদে পা মেলে জ্বলন্ত উনুনের সামনে একটা হাত মেলে দিয়ে চা খেতে বেশ লাগছে। মিসির আলি হাসিমুখে বললেন, দোকান আপনার কেমন চলে? লোকজন তো দেখি না।

দোকান চলে না। বিকিকিনি নাই। মানুষজন নাই, চা কে খাইব কন?

ভালো জায়গায় গিয়ে দোকান করেন যেখানে লোকজন আছে।

দাড়িওয়ালা লোকটি হাসিমুখে বলল, মনের টানে পইরা আছি। জায়গাটা বড় ভালো লাগে। মায়া পইরা গেছে। একবার মায়া পড়লে যাওন মুসিবত।

মিসির আলি চমকে উঠলেন। এই বুড়োর কথায় একটা সূত্র পাওয়া যাচ্ছে। তিনি বুঝতে পারছেন কেন এত কষ্টের পরও নাজিম বা রহিমার মা ও-বাড়িতে পড়ে আছে। সেখানেও মায়া ব্যাপারটাই কাজ করছে। এই মায়া তৈরীর ব্যাপারে তিন্লিরও নিশ্চয়ই একটি ভূমিকা আছে। মায়া জাগিয়ে রাখছে তিন্লি। কেউ তা বুঝতে পারছে না।

মানুষের সমস্ত আবেগ এবং অনুভূতির কেন্দ্র মস্তিষ্ক। মেয়েটি সেই মস্তিষ্ক নিয়ন্ত্রণ করতে পারে অতি সহজেই। মিসির আলির মনে হল এই মেয়েটি একই সঙ্গে দুটি কাজ করে আশেপাশের লোকজনদের একটু দূরে সরিয়ে রাখে। আবার টেনে রাখে নিজের দিকে।

মেয়েটি নিজের সব ক্ষমতাও সবাইকে দেখাচ্ছে না। যেমন ধরা যাক দূর থেকে কথোপকথনের ক্ষমতা। এর খবর এ-বাড়ির অন্য কেউ জানে না। কিন্তু কেন জানে না? কেন এই মেয়েটি এইসব তথ্য গোপন রেখেছে?

আবার পুরোপুরি গোপনও রাখছে না। তাঁর কাছে প্রকাশ করেছে। কেন করেছে? আশঙ্কা কেন? এর উত্তর বের করতে হবে। একটির পর একটি তথ্যকে সাজাতে হবে। একটি ছকের মধ্যে ফেলতে হবে। মিসির আলি চিন্তিত বোধ করলেন। নিজের অজান্তেই আরেক কাপ চা চাইলেন।

চায়ের দোকানি খুশিমনেই চা হাঁকতে বসল।

আমি কাল সকালেই দাম দিয়ে যাব।

কোনো অসুবিধা নাই। তিন কাপ চায়ের লাগিন ফতুর হইতাম না। আমরা ময়মনসিংহ-এর লোক। আমরার কইলজা বড়।

নাম কী আপনার?

রশীদ।

আচ্ছা ভাই রশীদ, আপনার কাছে সিগারেট আছে?

সিগারেট নাই, বিড়ি আছে। খাইবেন?

দেন দেখি একটা।

মিসির আলি চিন্তিত মুখে বিড়ি টানতে লাগলেন। বেলা বাড়ছে তাঁর খেয়াল নেই। অনেক কাজ পড়ে আছে সামনে। কাজ গুছাতে হবে। কীভাবে গুছাতে হবে তা পরিষ্কার বুঝতে পারছে না।

এ বাড়ির প্রতিটি মানুষকে জেরা করতে হবে। এলোমেলো প্রশ্ন উত্তর নয়। পুঙ্খানুপুঙ্খ জেরা। তিন্লির মা'র সম্পর্কে খোঁজ নিতে হবে। ভদ্রমহিলার চিঠিপত্র ডায়েরি এইসব দেখতে হবে। ভালোভাবে জানতে হবে তিনি মেয়ে সম্পর্কে কী ভাবছেন। মা'রা অনেক কিছু বুঝতে পারে।

কী ভাবেন?

মিসির আলি চমকে উঠে বললেন, কিছু ভাবি না ভাই। চায়ের জন্যে ধন্যবাদ। কাল সকালে আমি আবার আসব।

জি আইচ্ছা। আপনি ময়মনসিংহের লোক না মনে হইতাহে।

জি না। আমি ঢাকা থেকে এসেছি।

কুটুম্ববাড়ি?

জি কুটুম্ববাড়ি।



তোমার নাম রহিমা ?

জি।

ভালো আছ রহিমা ?

জি আল্লাহতালা যেমুন রাখছে।

রহিমা লম্বা একটা ঘোমটা টানল। এই লোকটি তার কাছে কী জানতে চায় তা সে বুঝতে পারছে না। সে তো কিছুই জানে না। তাকে কিসের এত জিজ্ঞাসাবাদ। তিন্নির আব্বা বলে দিয়েছেন— উনি যা জানতে চান সব বলবে। কিছুই গোপন করবে না। এও এক সমস্যা। গোপন করার কী আছে ?

রহিমা!

জি।

দেশের বাড়িতে তোমার কে কে আছেন ?

এক মাইয়া আছে।

মেয়েকে দেখতে যাও না।

জি যাই।

শেষবার কবে গিয়েছিলে ?

তিন বছর আগে।

এই তিন বৎসর যাও নি কেন ?

রহিমা চমকে উঠল। তাকিয়ে রইল ফ্যালফ্যাল করে। যেন সে নিজেই গভীর চিন্তায় পড়ে গেছে। কেন যায় নি।

মেয়ে যাবার জন্যে বলে না ?

জি বলে।

তবু যেতে ইচ্ছা করে না, তাই না ?

রহিমার মা চুপ করে রইল। মিসির আলি বললেন, তিন্নির মাকে তো তুমি দেখেছ তাই না ?

জি।

কেমন মহিলা ছিলেন ?

খুব ভালো। এমন মানুষ দেখি নাই। খুব সুন্দর আছিল। কীরকম ব্যবহার। কাউরে রাগ হয়ে কথা কয় নাই।

ঐ ভদ্রমহিলার মধ্যে তিন্নির মতো কোনো কিছু ছিল কি ?

জি না। বড় ভালো মানুষ ছিল। ইনার কথা মনে হইলেই চউক্ষে পানি আসে।

রহিমা সত্যি সত্যি চোখ মুছল। মিসির আলির আর কিছু জিজ্ঞেস করার ছিল না।

অন্যদের কাছ থেকে তেমন কিছু জানা গেল না। বাড়ির দারোয়ানের একটি কথা অবশ্যি বেশ গুরুত্বপূর্ণ। সে বলছে, তিন্নি ছোটবেলায় খুব ছুটাছুটি করত। বাগানে

দৌড়াত। যতই সে বড় হচ্ছে ততই তার ছোটোছুটি কমে যাচ্ছে। এখন বেশিরভাগ সময় সে ছাদে হাঁটাহাঁটি করে কিংবা চুপচাপ বসে থাকে।

তুমি কতদিন ধরে এ বাড়ি আছ ?

জি অনেক দিন।

ছুটিছাটায় দেশের বাড়িতে যাও না ?

জি যাই।

শেষ কবে গিয়েছিলে ?

অনেক হিসাব-নিকাশ করে দারোয়ান বলল, তিন বৎসর আগে একবার গেছিলাম।

গত তিন বৎসর যাও নি ?

জি না।

তিনি'র মা'র পুরানো চিঠিপত্র বা ডায়েরি কিছুই পাওয়া গেল না। বরকত সাহেব বললেন, এদেশের মেয়েদের কি আর ডায়েরি লেখার অভ্যাস আছে ? এরা ঘরের কাজকর্ম করেই সময় পায় না। ডায়েরি কখন লিখবে ?

চিঠিপত্র ? পুরানো চিঠিপত্র ?

পুরানো চিঠিপত্র কি কেউ জমা করে রাখে বলুন ? চিঠি আসে, আমরা চিঠি পড়ে ফেলে দেই। ব্যস। তাছাড়া ও চিঠি লিখবে কাকে ? বাপ-মা মরা মেয়ে ছিল। মামার কাছে মানুষ হয়েছে। বিয়ের পর সেই মামা মারা গেলেন। সে একা হয়ে গেল। চিঠিপত্র লেখার বা যোগাযোগের কেউ ছিল না।

আপনার স্ত্রী কি খুব বিষণ্ণ প্রকৃতির ছিলেন ?

না মনে হয়। হাসিখুশিইতো ছিল।

কোনোরকম অসুখ বিসুখ ছিল কি ?

বলার মতো তেমন কিছু না, সর্দি কাশি এইসবে খুব ভুগত। এটা নিশ্চয়ই তেমন কিছু না।

তিনি যখন তাঁর পেটে সে সময় কি তাঁর জার্মান মিজেলস হয়েছিল ?

এটা কেন জিজ্ঞেস করছেন ?

জার্মান মিজেলস একটা ভাইরাস ঘটিত অসুখ। এতে বাচ্চার অনেক ধরনের ক্ষতি হবার কথা বলা হয়। 'জিনে' কিছু ওলটপালট হয়।

না, এ ধরনের কোনো অসুখ-বিসুখ হয়নি।

মামস ? মামস হয়েছিল কি ?

না তাও না।

মিসির আলি বেশ খানিকক্ষণ চুপ করে থেকে বললেন, সেই সময় তিনি কি কোনো অদ্ভুত স্বপ্নটপ্প দেখতেন ?

বরকত সাহেব ঞ্চ কুঁচকে বললেন, কেন জিজ্ঞেস করছেন ?

মানসিক অবস্থাটা জানবার জন্যে। দেখতেন কি কোনো স্বপ্ন ?

হ্যাঁ দেখতেন।

কী ধরনের স্বপ্ন আপনার মনে আছে ?

ঠিক মনে নেই। প্রায়ই দেখতাম জেগে বসে আছে। কী হয়েছে জিজ্ঞেস করলে বলত, দুঃস্বপ্ন দেখেছি।

কী দুঃস্বপ্ন সেটা জিজ্ঞেস করেন নি ?

জি না, জিজ্ঞেস করিনি। স্বপ্নটপূর ব্যাপারে আমার তেমন উৎসাহ নেই। তবে সে নিজ থেকে কয়েকবার আমাকে বলতে চেষ্টা করেছে আমি তেমন গুরুত্ব দেই নি।

আপনার কি কিছুই মনে নেই ?

ও বলত তার দুঃস্বপ্নগুলি সব গাছপালা নিয়ে। এর বেশি আমার কিছু মনে নেই।

মিসির আলি বললেন, আমি আজ সন্ধ্যায় ঢাকা যাব। এখানকার কাজ আমার আপাতত শেষ হয়েছে। ঢাকায় আমি কিছু পড়াশোনা করব। খোঁজখবর করব। তারপর ফিরে আসব।

আজই যাবেন ?

হ্যাঁ আজই যাব। হাতে সময় বেশি নেই। কিছু একটা করতে হলে দ্রুত করতে হবে।

এ-কথা কেন বলছেন ?

ইনসটিংকট থেকে বলছি। আমার মনে হচ্ছে এ-রকম।

আপনি কিন্তু আমার মেয়ের সঙ্গে একবারই কথা বলেছেন। আমি চাচ্ছিলাম আপনি তার সঙ্গে দীর্ঘ আলাপ আলোচনা করবেন।

আমি আবার ফিরে আসছি। তখন করব।

কবে ফিরবেন ?

চেষ্টা করব খুব তাড়াতাড়ি ফিরতে।

আমার মেয়েটিকে কেমন দেখলেন বলুন।

এখনো বলবার মতো কিছু পাচ্ছি না।

পাবেন কি ?

পাব নিশ্চয়ই পাব। কেন পাব না ?

বরকত সাহেব একটি দীর্ঘনিশ্বাস ফেললেন। মনে হল তিনি খুব আশাবাদী নন।

তিনি প্রায় সারাদিনই ছাদে বসেছিল। মিসির আলি তার কাছ থেকে বিদায় নিতে গেলেন বিকেলে।

তিনি আমি চলে যাচ্ছি।

মেয়েটি বলল, আমি জানি।

আমি তোমার ছবিগুলি সঙ্গে করে নিয়ে যাচ্ছি।

তাও জানি।

কিছুদিনের মধ্যে আমি আবার আসব। তখন দেখবে সব ঝামেলা মিটে গেছে।

তিনি কিছু বলল না। মিসির আলি বললেন, গাছপালা তুমি খুব ভালোবাস তাই না?

মাঝে মাঝে বাসি। মাঝে মাঝে বাসি না।

তুমি কি ওদের সঙ্গে কথা বলতে পার ?

এখানে যেসব গাছপালা আছে তাদের সঙ্গে পারি না।

তাহলে কাদের সঙ্গে পার ?

মেয়েটি জবাব দিল না। মাথা নিচু করে বসে রইল। মিসির আলি বললেন, তুমি আমার অনেক প্রশ্নের জবাব দাও না। কেন দাও না বলো তো ? কোনো বাধা আছে কি?

তিনি সে প্রশ্নের জবাব না দিয়ে ফিসফিস করে বলল, আপনি আমাকে ভালো করে দিন। অসুখ সারিয়ে দিন।

মিসির আলির খুবই মন খারাপ হয়ে গেল। বাচ্চা একটি মেয়ে বাস করছে সম্পূর্ণ ভিন্ন একটি জগতে— যে জগতের সঙ্গে আশেপাশের চেনা জগতের কোনো মিল নেই। মেয়েটি কষ্ট পাচ্ছে। তার কষ্টের ব্যাপারটি কাউকে বলতে পারছে না। সে নিজেও হয়তো জানে না পুরোপুরি।

তিনি আমি যাই ?

মেয়েটি কিছু বলল না। মিসির আলি লক্ষ্য করলেন তিনি নিঃশব্দে কাঁদছে।

ঢাকায় ফেরার ট্রেনে উঠবার পর মিসির আলির মনে পড়ল তিনকাপ চায়ের দাম তিনি দিয়ে আসেন নি। রশীদ নামের বুড়োমানুষটি আগামীকাল ভোরবেলায় যখন দেখবে কেউ আসছে না তখন না-জানি কী ভাববে। মিসির আলির মন গ্লানিতে ভরে গেল। কিন্তু কিছুই করার নেই। ঢাকা মেইল ছুটে চলেছে। পেছনে পড়ে আছে নদীর ধারে গড়ে ওঠা চমৎকার একটি শহর।



ড. জাবেদ আহসান অবাক হয়ে বললেন, আপনি আমার কাছে ঠিক কী জানতে চান বুঝতে পারছি না। কয়েকটি গাছপালার হাতে-আঁকা ছবি দিয়ে গিয়েছেন, আর তো কিছু বলেন নি।

ছবিগুলি ভালো করে দেখেছেন?

ভালো করে দেখার কী আছে?

মিসির আলি লক্ষ্য করলেন ড. জাবেদ বেশ বিরক্ত। ভদ্রলোক ঢাকা বিশ্ববিদ্যালয়ের বোটানি ডিপার্টমেন্টের প্রফেসর। বিশ্ববিদ্যালয়ের প্রফেসররা তেমন কোনো কাজকর্ম করেন না, কিন্তু সবসময় ব্যস্ততার একটি ভঙ্গি করেন। ড. জাবেদ এই মুহূর্তে এমন মুখের ভাব করছেন যেন তাঁর মহামূল্যবান সময় নষ্ট হয়ে যাচ্ছে।

মিসির আলি বললেন, এই গাছগুলি সম্পর্কে কিছু বলুন। ছবিতে আঁকা গাছগুলির কথা বলছি।

কী বলব সেটাই বুঝতে পারছি না। আপনি কী জানতে চাচ্ছেন?

এ জাতীয় গাছ দেখেছেন কখনো?

না।

বইপত্রে এ-রকম গাছের কোনো রেফারেন্স পেয়েছেন?

দেখুন পৃথিবীতে লক্ষ লক্ষ ধরনের গাছ আছে। সবকিছু আমার জানার কথা নয়। আমার পিএইচডির বিষয় ছিল প্লাস্ট ব্রিডিং। সে সম্পর্কে আপনাকে আমি কিছু বলতে পারি। আপনি একটি বাচ্চামেয়ের আঁকা কতগুলি ছবি নিয়ে এসেছেন। সেই ছবিগুলি দেখে আমাকে গাছ সম্পর্কে বলতে বলছেন। এ ধরনের ধাঁধার পেছনে সময় নষ্ট করার আমি কোনো অর্থ দেখছি না।

মিসির আলি বললেন, আপনি বিরক্ত হচ্ছেন কেন?

বিরক্ত হচ্ছি কারণ আপনি আমার সময় নষ্ট করছেন।

মিসির আলি বললেন, আপনি বসে বসে টিভি দেখছিলেন। তেমন কিছুতো করছিলেন না। সময় নষ্ট করার কথা উঠছে না।

মিসির আলি ভাবলেন এই কথায় ভদ্রলোক ভীষণ রেগে যাবেন। ‘গেট আউট’ জাতীয় কথাবার্তাও বলে বসতে পারেন। কিন্তু আশ্চর্যের ব্যাপার তেমন কিছু হল না। ড. জাবেদকে মনে হল তিনি খানিকটা অপ্রস্তুত হয়েছেন। অপ্রস্তুত মানুষেরা যেমন খুব অদ্ভুত ভঙ্গিতে কাশতে থাকে ভদ্রলোক সে-রকম কাশছেন। কাশি থামার পর বেশ মোলায়েম স্বরে বললেন, একটু চা দিতে বলি?

জি না। চা খাব না।

একটু খান। ঠাণ্ডা পড়েছে। চা ভালোই লাগবে। বসুন চায়ের কথা বলে আসি।

চা এল। শুধু চা নয়। চায়ের সঙ্গে নানান রকমের খাবার দাবার। বিশ্ববিদ্যালয়ের শিক্ষকদের বাড়ির এই একটি বিশেষত্ব আছে। এরা অতিথিকে চায়ের সঙ্গে নানান রকম

খাবার দাবার দেয়। যা দেখে কেউ ধারণাও করতে পারে না এই সম্প্রদায় আর্থিক দিক দিয়ে পশু।

মিসির আলি সাহেব চা নিন।

তিনি চা নিলেন।

বলুন স্পেসিফিক্যালি আপনি কী জানতে চান।

পৃথিবীতে ঠিক এ জাতীয় গাছ আছে কি না তা কে বলতে পারবে? অর্থাৎ আমি জানতে চাচ্ছি গাছপালার ক্যাটালগ জাতীয় কিছু কি আছে যেখানে সব জাতীয় গাছপালার ছবি আছে? তাদের সম্পর্কে তথ্য লেখা আছে।

হ্যাঁ নিশ্চয় আছে। এ দেশে নেই। বোটানিক্যাল সোসাইটিতে আছে। ওদের একটি কাজই হচ্ছে গাছপালার বিভিন্ন স্পেসিসকে সিস্টেমেটিক ভাবে ক্যাটালগিং করা।

আপনি কি আমাকে কিছু লোকজনের ঠিকানা দিতে পারবেন যারা আমাকে এ ব্যাপারে সাহায্য করতে পারেন?

হ্যাঁ পারি। আপনি যাবার সময় আমি ঠিকানা লিখে দেব। আর কী জানতে চান?

মানুষ এবং গাছের মধ্যে পার্থক্য কি?

প্রশ্নটা আরো গুছিয়ে করুন।

মিসির আলি থেমে থেমে বললেন, আমরা তো জানি গাছের জীবন আছে। কিন্তু আমি যা জানতে চাচ্ছি সেটা হচ্ছে গাছের জীবনের সঙ্গে মানুষের জীবনের মিলটা কোথায়?

চট করে উত্তর দেয়া যাবে না। এর উত্তর দেবার আগে আমাদের জানতে হবে জীবন মানে কী? এখনো আমরা পুরোপুরিভাবে জীবন কী তাই জানি না।

বলেন কী? জীবন কী জানেন না!

হ্যাঁ তাই। বিজ্ঞান অনেক দূর আমাদেরকে নিয়ে গেছে কিন্তু এখনো অনেক কিছুই আমরা জানি না। অনেক আনসলভ মিস্ট্রি রয়ে গেছে। আপনাকে আরেক কাপ চা দিতে বলি?

বলুন।

ড. জাবেদ সিগারেট ধরিয়ে শান্ত স্বরে বললেন, অত্যন্ত আশ্চর্যের ব্যাপার হচ্ছে মানুষের সঙ্গে গাছের মিল অনেক বেশি।

বলেন কী!

হ্যাঁ তাই। আসল জিনিস হচ্ছে 'জীন' ঠিক করে কোন্ প্রোটিন তৈরী করা দরকার। অনেকগুলি জীন নিয়ে হয় একটি ডিএনএ মলিক্যুল। ডিওক্সি রিবো নিউক্লিয়িক এসিড। প্রাণের আদি ব্যাপার হচ্ছে এই জটিল অণু। এই অণু থাকে জীবকোষে। তারা ঠিক করে একটি প্রাণী মানুষ হবে, না গাছ হবে, না সাপ হবে। মাইটোকন্ড্রিয়া বলে একটি জিনিস মানুষেরও আছে, আবার গাছেরও আছে। মানুষের যা নেই তা হচ্ছে ক্লোরোপ্লাস্ট।

আপনার কথা কিছুই বুঝতে পারছি না।

বুঝতে পারার কথাও নয়। বিষয়টি অত্যন্ত জটিল। আপনি চাইলে আমি আপনাকে কিছু সহজ বইপত্র দিতে পারি।

আমি চাই। আমি আমাকে আরো কিছু বলুন।

ডি.এন.এ. প্রসঙ্গেই বলি। এই অণুগুলি হচ্ছে প্যাঁচালো সিঁড়ির মতো। মানুষের ডি.এন.এ. এবং গাছের ডি.এন.এ. প্রায় একইরকম। সিঁড়ির দু-একটা ধাপ শুধু আলাদা। একটু অন্য রকম।

মিসির আলি গভীর আগ্রহে তাকিয়ে আছেন। একজন ভালো শিক্ষক খুবই সহজেই একজন মনোযোগী শ্রোতাকে চিনতে পারেন। ড. জাবেদ এই মনোযোগী শ্রোতাকে পছন্দ করে ফেললেন।

শুধু এই দু-একটি ধাপ অন্যরকম হওয়ায় প্রাণীজগতে মানুষ এবং গাছ আলাদা হয়ে গেছে। প্রোটিন তৈরীর পদ্ধতি হয়েছে ভিন্ন। আপনি আগে বরং কয়েকটা বইপত্র পড়ুন। তারপর আবার আপনার সঙ্গে কথা বলব।

ড. জাবেদ তিনটি বই দিলেন। দুটি ঠিকানা লিখে দিলেন। একটি লন্ডনের রয়েল বোটানিক্যাল সোসাইটির অন্যটি ড. লংম্যানের। ড. লংম্যান আমেরিকান এগ্রিকালচারাল রিসার্চের ডেপুটি ডাইরেকটর।

মিসির আলি সাহেব তাঁর সঙ্গের ছবিগুলি দু-ভাগ করে দু-জায়গায় পাঠালেন। এবং আশ্চর্যের ব্যাপার দশদিনের মাথায় ড. লংম্যান-এর চিঠির জবাব চলে এল।

টমাস লংম্যান

Ph. D. D. Sc.

US Department of Agricultural Science

DD 505837 USA

প্রিয় এম. আলি,

আপনার পাঠানো ছবি এবং চিঠি পেয়েছি। যে সমস্ত লতানো গাছের ছবি আপনি পাঠিয়েছেন তা খুব সম্ভব কল্পনা থেকে আঁকা। আমাদের জানামতে ও-রকম গাছের কোনো অস্তিত্ব নেই। তবে পেরুর গহীন অরণ্যে এবং আমেরিকান রেইন ফরেস্টে কিছু লতানো গাছ আছে যার সঙ্গে আপনার পাঠানো গাছের সামান্য মিল আছে। আমি আপনাকে কিছু ফটোগ্রাফ পাঠালাম, আপনি নিজেই মিলিয়ে দেখতে পারেন। প্রসঙ্গত উল্লেখ করছি রেইন ফরেস্ট এবং পেরুর গাছগুলির রং সবুজ কিন্তু আপনার পাঠানো ছবির গাছের বর্ণ হলুদ এবং লালের মিশ্রণ। এর বেশি আপনাকে আর কোনো তথ্য দিতে পারছি না।

আপনার বিশ্বস্ত

টি. লংম্যান।

পুনশ্চ আপনি যদি ছবির মতো গাছের কিছু নমুনা পাঠান তাহলে আমরা তা অত্যন্ত আগ্রহের সঙ্গে পরীক্ষা করব।

রয়েল বোটানিক্যাল সোসাইটি চিঠির জবাব দিতে কুড়ি দিনের মতো দেরি করল। তাদের জবাবটি ছিল এক লাইনের।

প্রিয় ড. এম. আলি,
আপনার পাঠানো ছবির মতো দেখতে কোনো গাছের কথা
আমাদের জানা নেই।

আপনার বিশ্বস্ত
এ. সুরনসেন।

মিসির আলি সাহেব এই ক’দিনে জীবনের উৎপত্তি এবং বিকাশের ওপর গোটা চারেক বই পড়ে ফেললেন। ডি.এন.এ. এবং আর.এন.এ. মলিক্যুল সম্পর্কে পড়তে গিয়ে লক্ষ্য করলেন প্রচুর কেমিস্ট্রি জানা ছাড়া কিছু স্পষ্ট হচ্ছে না। বারবার এ্যামিনো এসিডের কথা আসছে। এ্যামিনো এসিড কী জিনিস তা তিনি জানেন না। অথচ বুঝতে পারছেন প্রাণের রহস্যের সঙ্গে এ্যামিনো এসিডের একটি ঘনিষ্ঠ সম্পর্ক আছে। মিসির আলি নাইন-টেনে পাঠ্য কেমিস্ট্রির বই কিনে এনে পড়াশুনা শুরু করলেন। কোমর বেঁধে পড়াশোনা যাকে বলে। এই ফাঁকে চিঠি লিখলেন তিন্নির বাবাকে। তিন্নির বাবা তার জবাব দিলেন না। তবে তিন্নি একটি চিঠি লিখল। কোনোরকম সম্বোধন চিঠিতে নেই। হাতের লেখা অপরিচ্ছন্ন। প্রচুর ভুল বানান। কিন্তু ভাষা এবং বক্তব্য বেশ পরিষ্কার। খুবই গুছিয়ে লেখা চিঠি, বাচ্চা একটি মেয়ের জন্যে যা বেশ আশ্চর্যজনক। চিঠির অংশ-বিশেষ এ-রকম।

(চিঠি)

আপনি আব্বাকে একটি লম্বা চিঠি লিখেছেন। আব্বা সেই চিঠি না-পড়েই ছিঁড়ে ফেলে দিয়েছেন। আব্বা এখন আর আপনাকে পছন্দ করছেন না। তিনি চান না আপনি আমার ব্যাপারে আর কোনো চিন্তাভাবনা করেন। কিন্তু আমি জানি আপনি করছেন। যদিও আপনি অনেক দূরে থাকেন তবু আমি বুঝতে পারি। আপনি যে আমাকে পছন্দ করেন তাও বুঝতে পারি। কেউ আমাকে পছন্দ করে না। কিন্তু আপনি করেন। কেন করেন? আমি তো ভালো মেয়ে না। আমি সবাইকে কষ্ট দেই। সবার মাথায় যন্ত্রণা দেই। কাউকেই আমার ভালো লাগে না। আমার শুধু গাছ ভালো লাগে। আমার ইচ্ছা করে একটা খুব গভীর জঙ্গলের মাঝখানে গিয়ে বসে থাকি। গাছদের সঙ্গে কথা বলি। গাছেরা কত ভালো। এরা কখনো একজন অন্যজনের সঙ্গে ঝগড়া করে না। মারামারি করে না। নিজের জায়গায় চুপচাপ দাঁড়িয়ে থাকে। এবং ভাবে। কত বিচিত্র জিনিস নিয়ে তারা ভাবে। এবং মাঝে মাঝে একজনের সঙ্গে অন্যজন কথা বলে। কী সুন্দর সেইসব কথা। এখন আমি মাঝে মাঝে ওদের কথা শুনতে পাই।

চিঠি এই পর্যন্তই। মিসির আলি এই চিঠিটি খুব কম হলেও দশবার পড়লেন। চিঠির কিছু অংশ লাল কালি দিয়ে দাগ দিলেন। যেমন একটি লাইন— এখন আমি মাঝে মাঝে ওদের কথা শুনতে পাই। স্পষ্টতই মেয়েটি গাছের কথা বলছে। পুরো ব্যাপারটাই সম্ভবত শিশুর কল্পনা। শিশুদের কল্পনার মতো বিশ্বুদ্ধ জিনিস আর কিছুই নেই। মিসির

আলির নিজের এক ভাগ্নি অমিতা গাছের সাথে কথা বলত। ওদের বাড়ির সামনে ছিল একটা খাটো কদমগাছ। অমিতাকে দেখা যেত গাছের সামনে উবু হয়ে বসে ঘণ্টার পর ঘণ্টা আলাপ করছে। মিসির আলি একদিন আড়ালে বসে কথাবার্তা শুনলেন।

কিরে আজ তুই এমন মুখ কালো করে রেখেছিস কেন? রাগ করেছিস? তুই এমন কথায় কথায় রাগ করিস কেন? কেউ বকেছে? কী হয়েছে বল তো ভাই শুন।

অমিতা অনেকক্ষণ চুপ করে রইল। যেন সে সত্যিসত্যি শুনতে পাচ্ছে গাছের কথা। মাঝে মাঝে মাথা নাড়ছে। একসময় সে উঠে দাঁড়াল এবং বিকট চিৎকার করে বলল— কে কদম গাছকে ব্যথা দিয়েছে? কে পাতাসুদ্ধ তার ডাল ছিড়েছে? কান্নাকাটি চিৎকার। জানা গেল আগের রাতে সত্যিসত্যি কদমগাছের একটি ডাল ভাঙা হয়েছে। ব্যাপারটা বেশ রহস্যজনক। কিছুদিন পর গাছটি আপনাআপনি মরে যায়। অমিতা নাওয়া-খাওয়া বন্ধ করে বড় অসুখে পড়ে যায়। জীবন-মরণ অসুখ। মাসখানিক ভুগে সেরে উঠে। গাছ প্রসঙ্গ চাপা পড়ে যায়।

মিসির আলি ঠিক করলেন অমিতার সঙ্গে দেখা করবেন। ছোটবেলার কথা জিজ্ঞেস করবেন। যদিও এটা খুবই সম্ভব যে অমিতার শৈশবের কথা কিছু মনে নেই। সে এখন থাকে কুমিল্লার ঠাকুরপাড়ায়। তার স্বামী পুলিশের ডি.এস.পি.। সে নিজে কোনো এক মেয়ে-স্কুলে পড়ায়। মিসির আলি ঠিক করলেন অমিতার সঙ্গে দেখা করেই চলে যাবেন ময়মনসিংহ। তিন্মির সঙ্গে কথা বলবেন। দু-একটা ছোটখাটো পরীক্ষা-টরীক্ষা করবেন। তিন্মির মা'র আত্মীয়স্বজনের খোঁজ বের করতে চেষ্টা করবেন। তিন্মিকে দিয়ে আরো কিছু ছবি আঁকিয়ে পাঠাবেন ড. লংম্যানের কাছে। অনেক কাজ সামনে। মিসির আলি দু-মাসের অর্জিত ছুটির জন্যে দরখাস্ত করলেন। বিশ্ববিদ্যালয়ে তাঁর চাকরির পদটি হচ্ছে অস্থায়ী। পাটটাইম শিক্ষকতার পদ। দু-মাসের ছুটি বিশ্ববিদ্যালয় তাকে দেবে না। হয়তো চাকরি চলে যাবে। কিন্তু উপায় কী! এই রহস্য তাঁকে ভেদ করতেই হবে। ছোট্ট একটি মেয়ে কষ্ট পাবে তা হতেই পারে না।



অমিতা অবাক হয়ে বলল, আরে মামা তুমি ?

মিসির আলি বললেন, চিনতে পারছিস রে বেটি ?

কী আশ্চর্য মামা। তোমাকে চিনব না ? তোমাকে নিয়ে কত গল্প করি মানুষের সাথে।

তিনি হাসলেন। অমিতা বলল, বিনা কারণে তুমি আমার কাছে আসনি। তুমি সেই মানুষই না। কী জন্যে এসেছ বল।

এখনি বলব ?

না এখন না। আমি স্কুলে যাচ্ছি। আজ আর ক্লাস নেব না। ছুটি নিয়ে চলে আসব। তুমি ততক্ষণে গোসল টোসল করে বিশ্রাম নাও। আমার ঘর-সংসার দেখ। ঘন ঘন চা খাওয়ার অভ্যাস এখনো আছে ?

হঁ আছে।

কাজের ছেলেটাকে বলে যাচ্ছি। সে প্রতি পনের মিনিট পরপর চা দেবে।

তোর ছেলেপুলে কই।

অমিতা ছোট্ট নিশ্বাস ফেলে বলল, আমার ছেলেপুলে নেই মামা। হবেও না কোনো দিন। তুমি তো কোনো খোঁজখবর রাখ না। কাজেই কিছুই জানো না। যদি জানতে তাহলে আর...

সে কথা শেষ করল না। মিসির আলি লক্ষ্য করলেন মেয়েটির গলা ভারী হয়ে এসেছে। কত রকম দুঃখ-কষ্ট মানুষের থাকে। তাঁর মন খারাপ হয়ে গেল।

তোর বর কোথায়?

ও ট্যুরে গেছে—চৌদ্দগ্রামে। সন্ধ্যাবেলায় ফিরবে। তুমি কি থাকবে সন্ধ্যা পর্যন্ত?

না। আমার একটা জরুরি কাজ আছে।

তাতো থাকবেই। তোমাকে যে আমি কত ভালোবাসি মামা অথচ তুমি...

অমিতার গলা আবার ভারী হয়ে গেল। এই মেয়েটার মনটা অসম্ভব নরম।

মিসির আলি গোসল সেরে ঘুরে-ঘুরে অমিতার ঘর-সংসার দেখলেন। বিরাট দোতলা বাড়ি। প্রতিটি ঘর চমৎকার করে সাজানো। লাইব্রেরি ঘরটি দেখে তাঁর মন ভরে গেল। বই বই আর বই। তাকিয়ে থাকতে ভালো লাগে।

কাজের ছেলেটির নাম চেরাগ মিয়া। সে সত্যি সত্যি পনের মিনিট পরপর চা নিয়ে আসছে। দু-কাপ চা খেয়ে মিসির আলি ধমক দিলেন— আর লাগবে না। দরকার হলে আমি চাইব। লাভ হল না। পনের মিনিট পর সে আবার এক কাপ চা নিয়ে এল।

দুপুরে খেতে বসে অমিতার সঙ্গে তিনি গাছের সঙ্গে কথা বলার প্রসঙ্গটা তুললেন।

অমিতা অবাক হয়ে বলল, এইটি জানবার জন্যে তুমি এসেছে আমার কাছে?

হঁ।

তুমি কি পাগল হয়ে গেলে নাকি মামা? পাগলরাই শুধু এইসব তুচ্ছ ব্যাপার নিয়ে ছুটাছুটি করে।

পাগল হই আর যাই হই, যা জানতে চাচ্ছি সেটা বল। তুই যে ছোটবেলায় গাছের সঙ্গে কথা বলতি সেটা মনে আছে?

হ্যাঁ আছে।

আচ্ছা, গাছ কি তোর সঙ্গে কথা বলত?

অমিতা হাসিমুখে বলল, গাছ আমার সঙ্গে কথা বলবে কী? গাছ আবার কথা বলা শিখল কবে?

তার মানে গাছের কোনো কথা তুই শুনতে পেতি না?

কীভাবে শুনব মামা? তুমি শুনতে পাও? এইসব ছোটবেলার খেয়াল। এটা নিয়ে তুমি মাথা ঘামাচ্ছ কেন?

এমনি।

উহঁ। এমি এমি মাথা ঘামাবার মানুষ তুমি না। নিশ্চয়ই কিছু-একটা আছে যা তুমি আমাকে বলতে চাচ্ছ না। ওকি মামা, তোমার কি খাওয়া হয়ে গেল!

হ্যাঁ।

অসম্ভব। এগার পদ রান্না করেছি। তুমি খেয়েছ মাত্র পাঁচ পদ, এখনো ছ'টা পদ বাকি আছে।

মরে যাব অমিতা।

মরে যাও আর যাই কর, খেতে হবে। জোর করে আমি মুখে তুলে খাইয়ে দেব। আমাকে তুমি চেনো না মামা।

মিসির আলি হাসলেন। অমিতা গম্ভীরমুখে বসে আছে। তার ভাবভঙ্গি দেখে মনে হচ্ছে সে সত্যি সত্যি জোর করে মুখে তুলে দেবে। মিসির আলি মৃদুস্বরে বললেন, গাছ তাহলে তোর সঙ্গে কোনো কথা বলত না?

অমিতা বিরক্ত স্বরে বলল, না। গাছ আমার সঙ্গে কেন কথা বলবে বল তো? আমি কি গাছ? ভালো করে তাকিয়ে দেখ তো আমার দিকে, আমাকে কি গাছ বলে মনে হয়?

মিসির আলি কিছু বললেন না। তাকিয়ে রইলেন মেয়েটির দিকে। তাঁর এই ভাগ্নিটি ভারি সুন্দর। দেবীর মতো মুখ। ঘন কালো তরল চোখ। মুখের ভাবটি বড় স্নিগ্ধ।

অমিতা বলল, মামা তুমি মানুষদের দুঃখ-কষ্ট দূর করবার জন্যে ছুটাছুটি কর অথচ আশেপাশে যারা আছে তাদের কথা কিছুই ভাবো না।

ভাবি না কে বলল?

না ভাবো না। ভাবলে এই ছ-বছরে একবার হলেও আসতে আমার কাছে।

মিসির আলি দেখলেন, অমিতার চোখ দিয়ে টপটপ করে পানি পড়ছে। তিনি একটি দীর্ঘনিশ্বাস ফেললেন। মেয়েগুলি এত নরম স্বভাবের হয় কেন, এই নিয়ে অন্যমনস্কভাবে তিনি খানিকক্ষণ ভাবলেন। একটি মেয়ের ডি.এন.এ. এবং একটি পুরুষের ডি.এন.এ. এর মধ্যে তফাৎ কী তাঁর জানতে ইচ্ছে হল। পড়াশোনা করতে হবে। প্রচুর পড়াশোনা। জীবন এত ছোট অথচ কত কী আছে জানার।



তিনি আজ সারাদিন ছাদে বসে আছে। সে ছাদে গিয়েছে সূর্য ওঠার আগে। এখন প্রায় সন্ধ্যা। কিছুক্ষণের মধ্যেই সূর্য ডুবে যাবে। এই দীর্ঘ সময়ের মধ্যে একবারও সে নিজের জায়গা থেকে নড়েনি। তার ছোট্ট শরীরটি পাথরের মূর্তির মতো স্থির হয়ে আছে। মাঝে মাঝে বাতাসে তার চুল উড়ছে। এ থেকেই মনে হয় এটি পাথরের মূর্তি নয়। জীবন্ত একজন মানুষ। সকালে কাজের মেয়ে নাস্তা নিয়ে ছাদে এসে ক্ষীণ গলায় বলেছিল, আপা নাস্তা আনছি।

তিনি কোনো জবাব দেয়নি। কাজের মেয়েটি আধঘণ্টার মতো অপেক্ষা করল। এর মধ্যে কয়েকবার নাস্তা খাবার কথা বলল। তাঁর কোনো ভাবান্তর হল না।

দুপুরবেলা বরকত সাহেব নিজেই এলেন। শান্ত গলায় বললেন, খেতে আস মা।

তিনি নিশ্চুপ। বরকত সাহেব তার হাত ধরলেন। হাত গরম হয়ে আছে। বেশ গরম। যেন মেয়েটির একশ তিন বা চার জ্বর উঠেছে। তিনি গাঢ় স্বরে বললেন, তোমার কি শরীরটা খারাপ মা?

তিনি না-সূচক মাথা নাড়ল।

এসো, ভাত দেয়া হয়েছে। দুজনে মিলে খাই।

সে আবার না-সূচক মাথা নাড়ল। যেন হাজার ভোল্টের ইলেকট্রিসিটি চলে গেল কপালের মাঝখান দিয়ে। তিনি মেয়ের হাত ছেড়ে দিয়ে অনেকক্ষণ হতভম্বের মতো দাঁড়িয়ে রইলেন। তিনি তখন খুব সহজ গলায় বলল, বাবা তুমি চলে যাও।

চলে যাব?

হঁ।

তুমি আসবে না?

না।

কিছু খাবে না?

খিদে নেই।

এক গ্লাস দুধ খাও। দুধ পাঠিয়ে দেই।

না।

বরকত সাহেব নিচে গেলেন। এ কী গভীর পরীক্ষায় তিনি পড়লেন! মেয়ের এই বিচিত্র অসুখের সত্যি কি কোনো সমাধান আছে? তাঁর মনে হতে লাগল সমাধান নেই। এই অসুখ বাড়তেই থাকবে। কমবে না। মিসির আলি নামের মানুষটির কিছুই করার ক্ষমতা নেই। মেয়েটিকে নিয়ে বিদেশে চলে গেলে কেমন হয়? ইউরোপ, আমেরিকার বড় বড় ডাক্তাররা আছেন। তাঁরা দিনকে রাত করতে পারেন—এই সামান্য কাজটা পারবেন না! খুব পারবেন। তিনি নিজে দুপুরে কিছু খেতে পারলেন না। মাথায় ভোঁতা যন্ত্রণা হতে লাগল। বিকেলের দিকে সেই যন্ত্রণা খুব বাড়ল। তিনি কয়েকবার বমি করলেন। অসম্ভব রাগে তাঁর শরীর কাঁপতে লাগল। কার ওপর রাগ? সম্ভবত নিজের ভাগ্যের ওপর। এত খারাপ ভাগ্যও মানুষের হয়?

তিনি সন্ধ্যা মিলাবার পর নিজের ঘরে ঢুকল। আজ অনেকদিন পর তার আবার ছবি আঁকতে ইচ্ছা হচ্ছে। রংতুলি সাজিয়ে সে উবু হয়ে মেঝেতে বসল। তার সামনে বড় একটি কাগজ বিছানো। সে খানিকক্ষণ চুপ করে বসে অতি দ্রুত তুলি বুলাতে শুরু করল। প্রথমে মনে হচ্ছিল কিছু লাইন এলোমেলো ভাবে টানা হচ্ছে। এখন আর তা মনে হচ্ছে না। এখন কাগজে লতানো গাছের ছবি স্পষ্ট হয়ে উঠছে। আকাশে দুটি সূর্য। তার আলো তেরছাভাবে গাছগুলির উপর পড়েছে।

তিনি মৃদুস্বরে বলল, তোমরা কেমন আছ?

ছবির গাছগুলি যেন উত্তরে কিছু বলল। তিনি একটি দীর্ঘনিশ্বাস ফেলে বলল, আমার কিছু ভালো লাগছে না। আমার খুব কষ্ট হচ্ছে। খুব কষ্ট।

গাছগুলি যেন তার উত্তরেও কিছু বলল। খুব কঠিন কোনো কথা। কারণ তিনিকে দেখা গেল দু-হাতে মুখ ঢেকে কেঁদে উঠেছে। সেই কান্না দীর্ঘস্থায়ী হল না। সে ছবিটি কুচিকুচি করে দিয়ে শান্ত হয়ে নিচে নেমে গেল। কারণ সে বুঝতে পারছে তার বাবা ঠিক এই মুহূর্তে তাকে নিয়ে ভাবছেন, সেই ভাবনাগুলি ভালো নয়। তার বাবা সমস্যার কাছে থেকে মুক্তি চান। কিন্তু যে পথ তিনি বেছে নিতে চাচ্ছেন তাতে কোনো লাভ হবে না।

বাবা।

বরকত সাহেব চমকে ফিরলেন। তাঁর ঘর অন্ধকার। তিনি ইজিচেয়ারে মাথা নিচু করে বসে আছেন। তিনি তাঁর সামনের খাটে পা ঝুলিয়ে বসল। বরকত সাহেব অস্বস্তির সঙ্গে তাঁর মেয়ের দিকে তাকাতে লাগলেন।

কিছু বলবে?

বলব।

বল শুনি। চেয়ারে বস। বসে বল।

তিনি খুব নরম গলায় বলল, তুমি আমাকে বাইরে নিয়ে যেতে চাও?

হঁ। বড় ডাক্তার দেখাব। পৃথিবীর সেরা ডাক্তার।

ডাক্তার কিছু করতে পারবে না।

কী করে বুঝলে?

আমি জানি। আমার কোনো অসুখ করেনি। আমি তোমাদের মতো না। আমি অন্যরকম।

সেটা আমি জানি।

না তুমি জানো না। সবটা জানো না।

ঠিক আছে না-জানলে জানি না। এতকিছু জানার আমার দরকার নেই। আমার টাকার অভাব নেই। তোমাকে আমি বড় বড় ডাক্তারের কাছে নিয়ে যাব। ইউরোপ। আমেরিকা।

আমি এইখানেই থাকব। আমি কোথাও যাব না।

বরকত সাহেব কড়া চোখে তাকালেন। তাঁর নিশ্বাস ভারী হয়ে এল। কপালে ঘাম জমতে লাগল। তিনি বলল, তোমরা কিছুতেই আমাকে এখান থেকে নিতে পারবে না। তোমাদের সেই শক্তি নেই।

বরকত সাহেব কিছু বললেন না। তিনি শান্ত সুরে বলল, এই বাড়িটাতে আমি একা থাকতে চাই বাবা।

একা থাকতে চাই মানে?

আমি একা থাকব। আর কেউ না।

কী বলছ এসব?

তিনি জবাব না দিয়ে উঠে দাঁড়াল। বরকত সাহেব কড়া গলায় বললেন, পরিস্কার করে বল তুমি কী বলতে চাও।

এই বাড়িটাতে আমি একা থাকব। আর কেউ থাকবে না। কাজের লোক, দারোয়ান, মালী এদের সবাইকে বিদায় করে দিয়ে তুমিও চলে যাও। তুমিও থাকবে না।

আমিও চলে যাব?

হ্যাঁ।

বরকত সাহেব উঠে এসে মেয়ের গালে প্রচণ্ড একটা চড় বসিয়ে দিলেন। তিনি কিছুই বলল না। শান্ত পায়ে উঠে চলে গেল। বরকত সাহেব লক্ষ্য করলেন তিনি বাগানে চলে যাচ্ছে। বাগান এখন ঘন অন্ধকার। বর্ষার পানি পেয়ে ঝোপঝাড় বড় হয়ে উঠেছে। সাপখোপ নিশ্চয়ই আছে। এই মেয়ে এখন এই সাপখোপের মধ্যে একা-একা হাঁটবে। অসহ্য! অসহ্য! কিন্তু করার কিছুই নেই। তাঁর মনে হল মেয়েটি মরে গেলে তিনি মুক্তি পান। জন্নোর পরপর তিনি জড়িস হয়ে ছিল। গা হলুদ হয়ে মরো-মরো অবস্থা। মেয়েকে ঢাকা পি.জি.তে নিয়ে যেতে হয়েছিল। বহু কষ্টে তাকে সারিয়ে তোলা হয়েছে। সেই সময় কিছু-একটা হয়ে গেলে আজ এই ভয়াবহ কষ্ট সহ্য করতে হত না।

তিনি কিছুক্ষণ অন্যমনস্ক ভঙ্গিতে ঘরের ভেতরে পায়চারি করলেন। একবার ভাবলেন বাগানে যাবেন। কিন্তু সেই চিন্তা দীর্ঘস্থায়ী হল না। কী হবে বাগানে গিয়ে? তিনি কি পারবেন এই মেয়েকে ফেরাতে? পারবেন না। সেই ক্ষমতাই তাঁর নেই। হয়তো কারোরই নেই। পীর ফকির ধরলে কেমন হয়? তিনি নিজে এইসব বিশ্বাস করেন না। সারাজীবন তিনি ভেবেছেন অস্বাভাবিক কোনো ক্ষমতা মানুষের নেই। থাকতে পারে না। কিন্তু এখন দেখছেন তার ধারণা সত্যি নয়। অস্বাভাবিক ক্ষমতা মানুষের থাকতে পারে। তিনিই আছে। কাজেই পীর ফকিরের কাছে বা সাধু সন্ন্যাসীর কাছে যাওয়া যেতে পারে।

স্যার!

কে?

তিনি দেখলেন চায়ের পেয়ালা হাতে কাদের দাঁড়িয়ে আছে। তিনি চায়ের পেয়ালা হাতে নিলেন। কাদের বলল, ঐ লোকটা আসছে।

কোন্ লোক?

আগে যে ছিলেন।

ও, মিসির আলি?

জি। আপনার সঙ্গে দেখা করতে চান।

বরকত সাহেব বিরক্ত স্বরে বললেন, দেখা করার কোনো দরকার নেই। আমি এখন ঘর থেকে বেরুই না। ভদ্রলোককে তাঁর ঘর দেখিয়ে দাও। খাবার দাবারের ব্যবস্থা কর। আর তিনি যদি তিনিই সঙ্গে দেখা করতে চান তাহলে তিনিকে খবর দাও। তিনি বাগানে গিয়েছে।

কাদের চলে গেল। আকাশে বিদ্যুৎ চমকাচ্ছে। ঝড়বৃষ্টি হবে বোধ হয়। বাতাস ভারী হয়ে আছে। চারদিকে অসহ্য গুমট।

মিসির আলি এসেছেন সন্ধ্যাবেলায়, এখন রাত এগারটা। কিছুক্ষণ আগেই রাতের খাবার শেষ করেছেন। প্রায় চার ঘণ্টার মতো হল তিনি এ বাড়িতে আছেন। কাদের এর মধ্যে দুবার জিজ্ঞেস করেছে সে তিনিকে খবর দেবে কি না। তিনি বলেছেন খবর দেবার দরকার নেই। কারণ তিনি নিশ্চয়ই জানে যে তিনি এসেছেন। আলাদা করে বলার কোনোই প্রয়োজন নেই।

তিনি আছে কোথায়?

বাগানে।

এই রাতের বেলায় বাগানে কী করছে?

জানি না স্যার। কয়েকদিন ধরে সন্ধ্যার পর বাগানে যায়। অনেক রাত পর্যন্ত থাকে।

তাই নাকি?

জি স্যার।

এত রাত পর্যন্ত বাগানে সে কী করে?

বাড়ির পিছনের দিকে একটা বড়ই গাছ আছে। সেই বড়ই গাছের কাছে একটা গর্ত। ঐখানে চূপচাপ দাঁড়িয়ে থাকে।

ও আচ্ছা।

মিসির আলির মুখ দেখে মনে হল তিনি এই খবরে তেমন অবাক হননি। বেশ সহজভাবে বললেন, তুমি বারান্দায় আমাকে একটা চেয়ার দাও। বারান্দায় বসে আকাশের শোভা দেখি। আর শোনো, ভালো করে এক কাপ চা দিও। আকাশে বিদ্যুৎ চমকচ্ছে, বৃষ্টি হবে বোধ হয়।

জি।

মিসির আলি বারান্দায় এসে বসবার প্রায় সঙ্গে সঙ্গেই টুপটুপ করে বৃষ্টির ফোঁটা পড়তে শুরু করল। মিসির আলি অপেক্ষা করতে লাগলেন কখন তিনি বেড়িয়ে আসবে। বৃষ্টির বেগ বাড়ছে। ঠাণ্ডা হাওয়া দিচ্ছে। এ-রকম একটি ঝড় জলের রাতে বাচ্চা একটি মেয়ে একা-একা বাগানে। কতরকম অদ্ভুত সমস্যা আমাদের চারদিকে। মিসির আলি সিগারেট ধরালেন। ইলেকট্রিসিটি চলে গিয়েছে। কেরোসিনের বাহারি ল্যাম্প জ্বালানো হয়েছে। কাদের একটি ল্যাম্প বাইরে নিয়ে আসতেই হাওয়া লেগে সেটি দপ করে নিভে গেল। ঠিক তখন মিসির আলি দেখলেন তিনি বের হয়ে আসছে। ভিজ়ে চূপসে গিয়েছে মেয়েটি। তিনিই তাকে দেখেছে। সে এগিয়ে এল মিসির আলির দিকে।

আপনি কখন এসেছেন?

অনেকক্ষণ হল। তুমি বুঝতে পারনি?

না। এখন দেখলাম।

মিসির আলি বেশ অবাক। মেয়েটি বুঝতে পারল না কেন? টেলিপ্যাথিক ক্ষমতা কি নষ্ট হয়ে গেছে?

কাদের হা করে তাকিয়ে আছে। সে কী করবে বুঝতে পারছে না। মিসির আলি বললেন, তিনি তুমি হাতমুখ ধুয়ে আস আমরা গল্প করি। ঝড়বৃষ্টির রাতে গল্প করতে বেশ ভালো লাগে। আর কাদের তুমি আমাদের দুজনের জন্যে চা নিয়ে আস। তিনি তুমি চায়ের সঙ্গে কিছু খাবে?

না।

কাদের ফিসফিস করে বলল, আপা আজ সারাদিন কিছু খায় নাই।

মিসির আলি বললেন, তাহলে কিছু খাবারও নিয়ে আস। হালকা কোনো খাবার।

না আমি কিছুই খাব না, খিদে নেই।

ঠিক আছে না খেলে। এসো গল্প করি। যাও হাতমুখ ধুয়ে আস। তোমার সমস্ত পা কাদায় মাখামাখি।

তিনি চলে গেল। কাদের একপট চা এনে রাখল সামনে। মিসির আলি অপেক্ষা করতে লাগলেন কিন্তু মেয়েটি সে রাতে আর তাঁর কাছে এল না। খুব ঝড় হল সারা রাত। শোঁ-শোঁ করে হাওয়া বইতে থাকল। মিসির আলি অনেক রাত পর্যন্ত ঘুমুতে পারলেন না। তাঁর বারবার মনে হতে লাগল হয়তো কিছুক্ষণের মধ্যেই মেয়েটি যোগাযোগ করবে তাঁর সঙ্গে। দুজন দু-জায়গায় বসে অনেক রাত পর্যন্ত গল্প করবেন। কিন্তু তা হল না।

সূর্য এখনো উঠেনি। মিসির আলি দ্রুত পা ফেলছেন। ব্রহ্মপুত্র নদী মনে হচ্ছে এখনো ঘুমিয়ে। দিনের কর্মচাঞ্চল্য শুরু হয়নি। কাল রাতের বৃষ্টির জন্যেই বুঝি চারদিক ঝিলমিল করছে। মিসির আলি গত রাতটা প্রায় অঘুমের কাটিয়েছেন। কিন্তু তার জন্যে খারাপ লাগছে না। শরীরে কোনো ক্লান্তি নেই। তিনি খুঁজছেন চাওয়ালাকে। পাওনা টাকাটা দিয়ে দেবেন। গল্পগুজব করবেন। তাঁর মনে একটা আশঙ্কা ছিল হয়তো এই চাওয়ালা বুড়োর আর খোঁজ পাওয়া যাবে না। বাকি জীবন মনের মধ্যে এই ক্ষুদ্র ঘটনা কাঁটার মতো বিধে থাকবে। আশঙ্কা সত্যি হল না। বুড়োকে পাওয়া গেল। কেতলিতে চায়ের পানি ফুটে উঠেছে। কেতলির নল দিয়ে ধুঁয়া বেরুচ্ছে। বুড়োর মুখ হাসি-হাসি।

কেমন আছেন বুড়ো মিয়া।

আল্লায় যেমন রাখছে। আপনার শইল বালা?

জ্বি ভালো। আমাকে চিনতে পারছেন না? ঐ যে চা খেয়ে পয়সা না দিয়ে চলে গেলাম।

বুড়ো হেসে ফেলল। মিসির আলি বললেন, জরুরি কাজে ঢাকায় চলে গিয়েছিলাম। কাল এসেছি। আপনার টাকা নিয়ে এসেছি। চা কি হয়েছে?

বুড়ো চায়ের কাপে লিকার ঢালতে লাগল। মিসির আলি বললেন, আপনি নিশ্চয়ই মনে মনে আমাকে খুব গালাগালি করেছেন।

জ্বি না মিয়া সাব। অত অল্প কারণে কি আর গাইল দেওন যায়? আমি জানতাম আপনে আইবেন।

কী করে জানতেন?

বুঝা যায়।

এই কথাটি ঠিক। অনেক কিছুই বোঝা যায়। রহস্যময় উপায়ে বোঝা যায়। চায়ের কাপে চুমুক দিয়ে মিসির আলির মনে হল তিনি ব্রহ্মপুত্র নদী খানিকটা বুঝতে পারছেন। আবহাভাবে বুঝছেন।

কী ভাবেন মিয়া সাব?

না কিছু না। উঠি।

মিসির আলি চায়ের দাম মিটিয়ে রওনা হবেন, ঠিক তখন মাথা ঝিম করে উঠল।
তিনি়র পরিস্কার রিনরিনে গলা—আপনি ভালো আছেন? মিসির আলি আবার বেঞ্চিতে
বসে পড়লেন। বুড়ো বলল, কী হইছে? বসেন বসেন।

মিসির আলি মনে মনে তিনি়র সঙ্গে কথা চালিয়ে যেতে লাগলেন।

গত রাতে তুমি আসনি কেন?

ইচ্ছা করছিল না।

না এসেও তো কথা বলতে পারতে। তাও বলনি।

ইচ্ছা করছিল না।

এখন ইচ্ছা করছে?

হ্যাঁ করছে। কথা বলতে ইচ্ছা করছে।

বল কথা বল। আমি শুনছি।

আমি এখন এখানকার গাছের কথা বুঝতে পারি।

বাহ্ চমৎকার তো।

তাই রোজ সন্ধ্যাবেলায় বাগানে যাই। ওদের কথা শুনি।

দিনের বেলা শুনতে পাও না?

না, দিনের বেলায় ওরা কোনো কথা বলে না। চুপ করে থাকে। ওরা কথা বলে শুধু
সন্ধ্যার দিকে। রাতে আবার চুপ করে যায়। ওরাতো আর মানুষের মতো না যে সারাদিন
বকবক করবে।

তাতো ঠিকই। ওরা কী কথা বলে তোমার সঙ্গে?

আমার সঙ্গে তো কোনো কথা বলে না। ওরা কথা বলে নিজেদের মধ্যে। আমি
শুনি।

কী নিয়ে কথা বলে?

অদ্ভুত জিনিস নিয়ে কথা বলে। বেশির ভাগই আমি বুঝতে পারি না।

তবু বল। আমার শুনতে ইচ্ছা করছে।

জীবন কী, জীবনের মানে কী এইসব নিয়ে তারা কথা বলে। নিজেদের মধ্যে কথা
বলে।

তাই নাকি?

হ্যাঁ। আর কথা বলে মানুষদের নিয়ে। পশুপাখিদের নিয়ে। এরা পৃথিবীর মানুষদের
কথা জানে। এরা কী বলে কী করে—এইসব জানে। মানুষদের নিয়ে ভাবে।

বাহ্, চমৎকার তো।

একটা গাছ যখন মারা যায় তখন সারাজীবন যা জানল তা অন্য গাছদের জানিয়ে
যায়। মানুষদের যখন কষ্ট হয় তখন তাদের কষ্ট হয়। মানুষদের যখন আনন্দ হয় তখন
তাদেরও আনন্দ হয়।

মানুষ যখন একটা গাছকে কেটে ফেলে বা আগুন দিয়ে পুড়িয়ে ফেলে তখন তারা
মানুষদের ওপর রাগ করে না?

না। তারা রাগ করতে পারে না। তারা তো মানুষের মতো নয়। তারা শুধু
ভালোবাসে। জানেন তাদের মনে খুব কষ্ট।

কেন বল তো?

কারণ খুব শিগগিরই পৃথিবীতে কোনো মানুষ থাকবে না। কোনো জীব থাকবে না। পৃথিবী আস্তে আস্তে গাছে ভরে যাবে। এইজন্যেই তাদের দুঃখ।

মানুষ থাকবে না কেন?

এরা নিজেদের মধ্যে যুদ্ধ করে শেষ হয়ে যাবে। এটম বোমা ফাটাবে। পৃথিবী ছাড়াও তো আরো অনেক গ্রহ আছে যেখানে একসময় মানুষ ছিল। এখন নেই। এখন শুধু গাছ।

গাছদের জন্যে এটা তো ভালোই, তাই নয় কি তিনি? শুধু ওরা থাকবে আর কেউ থাকবে না।

তিনি দীর্ঘ সময় চুপ করে রইল, তারপর মৃদুস্বরে বলল, না ভালো না। ওরা সবাইকে নিয়ে বাঁচতে চায়। সারাভীবনে ওরা যত জ্ঞান লাভ করেছে এগুলি মানুষকে বলতে চায়। কিন্তু বলার আগেই মৃত্যু শেষ হয়ে যায়। ওরা বলতে পারে না। এই জন্যে ওদের খুব কষ্ট।

মানুষকে ওরা ওদের কথা বলতে পারছে না কেন?

বলতে পারছে না কারণ মানুষতো এখনো খুব উন্নত হয়নি। ওদেরকে অনেক উন্নত হতে হবে। কিন্তু তা হবার আগেই তো ওরা শেষ হয়ে যায়।

এইসব কথা কি তোমার আশেপাশের গাছদের কাছ থেকে জানলে?

না। অন্য গাছ আমাকে বলেছে। আমি যখন ঘুমিয়ে থাকি তখন ওরা বলে।

তুমি যেসব গাছের ছবি আঁকো সেইসব গাছ?

তিনি খানিকক্ষণ চুপ করে থেকে বলল, আমার আর কথা বলতে ইচ্ছে করছে না।

মিসির আলি উঠে দাঁড়ালেন। বুড়ো চাওয়ালা বলল, শীলটা কি এখন ঠিক হইছে? কাইল আবার আইসেন।

না কাল আসতে পারব না। কাল আমি ঢাকা চলে যাব। আবার যখন আসব তখন কথা হবে।

বরকত সাহেবের সঙ্গে দেখা হল চায়ের টেবিলে। তাঁর মুখ অস্বাভাবিক গম্ভীর। ভালোমতো চোখ তুলে তাকাচ্ছেন না। ভাবভঙ্গি দেখে মনে হচ্ছে মিসির আলির ওপর বেশ বিরক্ত। মিসির আলি এই বিরক্তির কারণ ঠিক ধরতে পারলেন না। মিসির আলি বললেন, আপনার শরীর কেমন?

আমার শরীর ভালোই। আমার শরীর খারাপ হাওয়ার তো কোনো কারণ ঘটেনি। আপনি ঢাকায় এতদিন কী করলেন?

তেমন কিছু করতে পারি নি, খোঁজখবর করছি।

খোঁজখবর তো যথেষ্টই করা হল আর কত?

আপনি মনে হয় আশা ছেড়ে দিয়েছেন।

হ্যাঁ, ছেড়ে দিয়েছি। এই সমস্যার কোনো সমাধান নেই। আপনি অনেক চেষ্টা করেছেন। সেইজন্যে আপনাকে অসংখ্য ধন্যবাদ। আপনার পারিশ্রমিক হিসেবে একটি চেক আপনার জন্যে তৈরী করে রেখেছি। কাদের আপনাকে দেবে। আমি চাই না এ ব্যাপারটি নিয়ে আপনি আর মাথা ঘামান।

মিসির আলি অবাক হয়ে বললেন, আমি কিছু বুঝতে পারছি না।

ভাগ্যকে স্বীকার করে নেবার চেষ্টা করছি। যা ঘটছে এটা আমার ভাগ্য।

না জানতে পারেন না। আমি ঐসব নিয়ে আর মাথা ঘামাতে চাই না। সমস্ত ব্যাপারটা থেকে আমি হাত ধুয়ে ফেলতে চাই।

মিসির আলি ঠাণ্ডা গলায় বললেন, গোড়া থেকেই আপনি অনেক কিছু আমার কাছ থেকে গোপন করেছেন। যেটা উচিত হয়নি।

বরকত সাহেব ঠাণ্ডা গলায় বললেন, আমি ধারণা করেছিলাম আপনি নিজেই তা ধরতে পারবেন। এখন দেখছি আমার ধারণা ঠিক নয়। আপনি কিছুই ধরতে পারেন নি।

একেবারেই যে ধরতে পারিনি তা নয়। আমার ধারণা আপনার স্ত্রী আপনাকে বলে গিয়েছিল তিনি মেয়েটি বড় হলে কেমন হবে। অর্থাৎ আজকের এই সমস্যার ব্যাপারটি সম্পর্কে আপনার স্ত্রী ভবিষ্যৎবাণী করেছিলেন।

এই জাতীয় ধারণা হবার পেছনে আপনার যুক্তি কী?

যুক্তি অবশ্যই আছে। এবং বেশ কঠিন যুক্তি।

বলুন, শুনি আপনার কঠিন যুক্তি।

মিসির আলি সিগারেট ধরালেন। বরকত সাহেবের চোখের দিকে তাকালেন তীক্ষ্ণ দৃষ্টিতে। এবং শান্ত স্বরে বললেন, আমি প্রথমেই লক্ষ্য করলাম আপনি আপনার মেয়ের অস্বাভাবিকতাগুলি মোটামুটি সহজভাবেই গ্রহণ করেছেন। তেমন বিচলিত হন নি। আমাকে ছাড়া দ্বিতীয় কোনো ব্যক্তিকে জানান নি। এ থেকেই মনে হয়েছে আপনার মেয়ের এইসব অস্বাভাবিকতা সম্পর্কে আপনি মানসিকভাবে প্রস্তুত। এই প্রস্তুতি কোথেকে আসতে পারে? আমার মনে হয়েছে কেউ নিশ্চয় আগেই আপনাকে বলেছে। কে বলতে পারে? আমার মনে হয়েছে আপনার স্ত্রীর কথা। কারণ আপনার স্ত্রী হচ্ছেন...।

বরকত সাহেব মিসির আলির কথা শেষ করতে দিলেন না। উঠে দাঁড়ালেন এবং কঠিন স্বরে বললেন, আমার প্রচণ্ড মাথা ধরেছে। আপনি এখন যান, পরে কথা বলব।

মিসির আলি নিঃশব্দে উঠে এলেন। চলে গেলেন বাগানে। বড়ইগাছটি খুঁজে বের করবেন। তিনি বড়ইগাছের একটা গর্তে দাঁড়িয়ে থাকে। এ গর্তটিও পদীক্ষা করে দেখবেন। কিন্তু সেই সুযোগ হল না। ভয়াবহ একটি ব্যাপার ঘটল। প্রকাণ্ড একটা মরাল সাপ হঠাৎ যেন আকাশ ফুঁড়ে নেমে এল। মিসির আলি চমকে উঠলেন। তাঁর চোখ থেকে চশমা খুলে পড়ল। আর ঠিক তখন মনে হল এই দৃশ্যটি সত্যি নয়। ময়মনসিংহ শহরের একটি বাড়িতে এতবড় একটি মরাল এসে উপস্থিত হতে পারে না। তাছাড়া কোনো সাপ পেটে ভর দিয়ে নিজের মাথাটা এত উঁচুতে তুলতে পারে না। এই দৃশ্যটি নিশ্চয়ই তিন্মির তৈরী-করা। মেয়েটি এই ছবি দেখাচ্ছে। মিসির আলি চোখ বন্ধ করলেন। আর ঠিক তখন তিন্মির হাসি শোনা গেল। মেয়েটি তার ঘরে বসেই হাসছে তিনি শুনতে পাচ্ছেন। তিন্মির হাসি থামল। সে রিনরিনে গলায় বলল, খুব ভয় পেয়েছেন?

তা পেয়েছি।

কিন্তু যতটা ভয় পাবেন ভেবেছিলেন ততটা পান নি। আপনি বুঝে ফেলেছেন যে এটা মিথ্যা সাপ।



একটি ভয়াবহ ব্যাপার ঘটল

হ্যাঁ, তাও ঠিক।

আপনার এত বুদ্ধি কেন বলুনতো?

জানি না।

সব মানুষের যদি আপনার মতো বুদ্ধি হত তাহলে খুব ভালো হত। তাই না?

মিসির আলি হেসে ফেললেন। হাসি থামিয়ে শান্ত গলায় বললেন, তুমি আমাকে ভয় দেখালে কেন?

আপনিই বলুন কেন। আপনার এত বুদ্ধি আর এই সহজ জিনিসটা বলতে পারবেন না?

আন্দাজ করতে পারছি। তুমি চাও না আমি ঐ গর্তটি দেখি যেখানে তুমি রোজ দাঁড়াও। তাই না?

হ্যাঁ, তাই।

দেখ তিন্দি আমি তোমার ব্যাপারটা বুঝতে চাই। কিন্তু তুমি আমাকে বুঝতে দিচ্ছ না। তুমি আমাকে সাহায্য না করলে আমি তোমাকে সাহায্য করতে পারছি না। আমার এত ক্ষমতা নেই।

তিন্দি ক্লান্ত গলায় বলল, কোনো মানুষ আমাকে সাহায্য করতে পারবে না। যারা পারত তারা করবে না।

কারা পারত?

তিন্দি জবাব দিল না।

মিসির আলির মনে হল মেয়েটি কাঁদছে।



মিসির আলি ঘুমিয়ে পড়েছিলেন। দরজায় খুটখুট শব্দ শুনে জেগে উঠলেন। অনেক রাত। ঘড়ির ছোট কাঁটা একের ঘর পার হয়ে এসেছে। তিনি মুদুস্বরে বললেন, কে? কোনো জবাব এল না। কিন্তু দরজার কড়া নড়ল। মিসির আলি অবাক হয়ে দরজা খুললেন। অন্ধকারে বরকত সাহেব দাঁড়িয়ে আছেন।

সরি, আপনার ঘুম ভাঙলাম বোধ হয়।

কোনো অসুবিধা নেই, আপনি আসুন।

বরকত সাহেব ইতস্তত করে বললেন, ঘুম আসছিল না ভাবলাম আপনার সঙ্গে খানিকক্ষণ গল্প করি।

খুব ভালো করেছেন। বসুন।

বরকত সাহেব বসলেন। তাঁকে দেখে মনে হচ্ছে তিনি খুব অস্বস্তি বোধ করছেন। বসে আছেন মাথা নিচু করে। একজন অহংকারী লোক এভাবে কখনো বসে না। মিসির আলি বললেন, আমার মনে হয় আপনি আপনার স্ত্রীর কথা কিছু বলতে চান। বলুন আমি শুনছি।

বরকত সাহেব চুপ করে রইলেন। তাঁর মাথা আরো একটু ঝুঁকে পড়ল। মিসির আলি বললেন, আমি বরং বাতি নিভিয়ে দেই তাতে কথা বলতে আপনার সুবিধা হবে। আলোতে আমরা অনেক কথা বলতে পারি না। অন্ধকারে সহজে বলতে পারি।

বাতি নেভাবার পর ঘর কেমন অন্যরকম হয়ে গেল। গা ছমছম করতে লাগল। যেন এই ঘরটি এতদিনের চেনা কোনো ঘর নয়। অন্য কোনো রহস্যময় অচেনা ঘর। বরকত সাহেব সিগারেট ধরিয়ে মৃদু স্বরে বলতে লাগলেন : আমার স্ত্রী খুবই সহজ এবং সাধারণ একজন মহিলা। বলার মতো তেমন কোনো বিশেষত্ব তাঁর নেই। কোনোরকম অস্বাভাবিকতাও তার চরিত্রে ছিল না। তবে আমার শাশুড়ি একজন অস্বাভাবিক মহিলা ছিলেন। বিয়ের আগে তা জানতে পারিনি। জেনেছি বিয়ের অনেক পরে।

আমার স্ত্রীর জন্মের পরপর আমার শাশুড়ি মারা যান। আমার শাশুড়ি সম্পর্কে এখন আপনাকে যা বলছি সবই শোনা কথা। আমার স্ত্রীর জন্মের ঠিক আগে-আগে আমার শাশুড়ি অদ্ভুত আচার-আচরণ করতে থাকেন। তার ভেতর উল্লেখযোগ্য হচ্ছে খাওয়া-দাওয়া বন্ধ করে রোদে বসে থাকা। এখন তিন্মি যা করে অনেকটা তাই। আমার শাশুড়ি লোকজনদের বলতে শুরু করেন তাঁর পেটে মানুষের বাচ্চা নয়, তাঁর পেটে বড় হচ্ছে একটা গাছ। সবাই বুঝল এটা মাথাখারাপের লক্ষণ। গ্রাম্য চিকিৎসা হতে থাকল। কোনো লাভ হল না। তিনি বলতেই থাকলেন তাঁর পেটে বড় হচ্ছে একটা গাছ। যাই হোক যথাসময়ে আমার স্ত্রীর জন্ম হল। ফুটফুটে একটি মেয়ে। আমার শাশুড়ি মেয়েকে কোলে নিলেন কিন্তু বললেন—তোমরা বুঝতে পারছ না এ আসলে মানুষ নয়, এ একটা গাছ। এর কিছুদিন পর আমার শাশুড়ি মারা যান।

আপনাকে আগেই বলেছি আমার স্ত্রী খুব স্বাভাবিক মহিলা ছিলেন। কিন্তু তিনি যখন পেটে এল তখন তার ভেতরেও অস্বাভাবিকতা দেখা দিল। এক রাতে সে আমাকে ঘুম থেকে ডেকে তুলে বলল— তার পেটে যে বড় হচ্ছে সে মানুষ নয়, সে একটা গাছ। আমি এমন ভাব দেখালাম যে এই খবরে মোটেও অবাক হই নি। আমি বললাম, তাই কি?

সে বলল, হ্যাঁ।

কী করে বুঝলে?

অনেক দূরের কিছু গাছ আমাকে স্বপ্নে বলেছে। তারা বলেছে, তোমার গর্ভে যে জন্মেছে তাকে খুব যত্নে বড় করবে। কারণ তাকে আমাদের খুব দরকার।

স্বপ্নে তো মানুষ অনেক কিছুই দেখে। স্বপ্নটাকে কখনো সত্যি মনে করতে নেই।

এটা সত্যি। এটা স্বপ্ন নয়।

ঠিক আছে সত্যি হলে সত্যি। এখন ঘুমাও।

তিনিও জন্মের কিছুদিন পর আমার স্ত্রী মারা গেল। তার মৃত্যুর দুদিন আগে তিনিকে কোলে নিয়ে আমি তার কাছে গেলাম। হাসিমুখে বললাম, কী সুন্দর একটি মেয়ে, তুমি বলছ গাছ?

আমার স্ত্রী ক্লান্ত ভঙ্গিতে হাসল। শান্ত স্বরে বলল, তুমি বুঝতে পারছ না। কিন্তু একদিন বুঝবে। আমি হাসতে হাসতে বললাম, একদিন সকালবেলা দেখব তিনি চারদিকে ডালপালা গজিয়েছে। নতুন পাতা ছেড়েছে?

আমার স্ত্রী তার জবাব দিল না। কঠিন চোখে তাকিয়ে রইল। যেন আমার কথায় সে অসম্ভব রেগে গেছে।

বরকত সাহেব খামলেন। ঘর অন্ধকার কিন্তু মিসির আলি পরিষ্কার বুঝতে পারছেন ভদ্রলোকের চোখ দিয়ে পানি পড়ছে।

আপনি আমার স্ত্রী সম্পর্কে জানতে চাচ্ছিলেন। আমি যা জানি আপনাকে বললাম। এখন আপনি আমাকে বলুন কী হচ্ছে।

মিসির আলি কী বলবেন ভেবে পেলেন না। বরকত সাহেব ধরা-গলায় বললেন, কিছুদিন থেকে তিনি বাগানে একটি গর্ভে চূপচাপ ঘণ্টার পর ঘণ্টা দাঁড়িয়ে থাকে। ফিরে আসে অনেক রাতে। আমার প্রায়ই মনে হয় একদিন সে হয়তো আর ফিরবে না। সেখানেই থেকে যাবে এবং দেখবে...।

বরকত সাহেব কথা শেষ করলেন না। তাঁর গলা বন্ধ হয়ে এল। মিসির আলি বললেন, নিন এক গ্লাস পানি খান। বরকত সাহেব তৃষ্ণার্তের মতো পানির গ্লাস শেষ করলেন।

মিসির আলি সাহেব।

জি বলুন।

তিনি এখন আমাকে বলছে বাড়ি ছেড়ে যেতে। সে একা থাকবে এখানে। কাজের লোক থাকবে না, দারোয়ান মালী কেউ থাকবে না। থাকবে শুধু সে একা। এবং আপনি জানেন মেয়েটি যা চায় তাই আমাকে করতে হবে। ওর অসম্ভব ক্ষমতা। আপনি তার পরিচয় ইতিমধ্যেই হয়তো পেয়েছেন।

হ্যাঁ তা পেয়েছি।

কী হচ্ছে আপনি আমাকে বলুন। এবং আমি কী করব সেটা আমাকে বলুন। আমার শরীরও বেশি ভালো না। ব্লাডপ্রেশার আছে, ইদানীং সুগারের প্রবলেম দেখা দিয়েছে। রাতের পর রাত ঘুমুতে পারি না।

মিসির আলি দৃঢ় গলায় বললেন, হাল ছেড়ে দেবার মতো এখনো কিছু হয়নি।

হালই তো নেই। হাল ধরবেন কীভাবে?

বরকত সাহেব উঠে পড়লেন। বাকি রাতটা মিসির আলি জেগেই কাটালেন। এক্কার ঘরে শুয়ে-শুয়ে সমস্ত ব্যাপারটা গুছাতে চেষ্টা করলেন। ‘জিগ স পাজল’ একটির সঙ্গে অন্যটির কিছুতেই মিলে না। তবু কি কিছু একটা দাঁড়া করানো যায় না?

একটা পর্যায়ে জীবনকে প্রকৃতি দু-ভাগে ভাগ করলেন—প্রাণী এবং উদ্ভিদ। প্রাণীরা ঘুরে বেড়াতে পারে, উদ্ভিদ পারে না। পরবর্তী সময়ে প্রাণের বিকাশ হল। ক্রমে ক্রমে জন্ম হল অসাধারণ মেধাসম্পন্ন প্রাণী—মানুষ। এই বিকাশ শুধু প্রাণীর ক্ষেত্রে হবে কেন? কেন উদ্ভিদের বেলায়ও হবে না?

ধরা যাক উদ্ভিদের বেলায়ও বিকাশ হল। একসময় জন্ম হল এমন একশ্রেণীর উদ্ভিদ, অসাধারণ যাদের মেধা। এই পৃথিবীতে হয়তো হল না, হল অন্য কোনো গ্রহে। একটি উন্নত প্রাণী খুঁজে বেড়াবে অন্য উন্নত জীবনকে। কারণ তারা চাইবে তাদের আহরিত জ্ঞান অন্যকে জানাতে। তখন তারা কি চেষ্টা করবে না ভিন জাতীয় প্রাণের সঙ্গে যোগাযোগের? সেই যোগাযোগের মাধ্যম হিসাবে এমন একটি ‘প্রাণ’ তার দরকার যে একই সঙ্গে মানুষ এবং উদ্ভিদ। এ জাতীয় একটি প্রাণ সে তৈরী করতে চেষ্টা করবে। তার জন্যে তাকে ডিএনএ অণুর পরবর্তন ঘটাতে হবে। প্রথমে পরীক্ষাতেই সে তা পারবে না। পরীক্ষাটি তাকে করতে হবে বার বার।

তিনি কি এ-রকম একজন কেউ? মহাজ্ঞানী উদ্ভিদগোষ্ঠীর পরীক্ষার একটি বস্তু? মানুষ যদি উদ্ভিদ নিয়ে, ইঁদুর নিয়ে, ল্যাবরেটরিতে নানান ধরনের পরীক্ষা করতে পারে ওরা কেন পারবে না?

কিন্তু তারা পরীক্ষাটা করছে কীভাবে? একজন মানুষ ল্যাবরেটরিতে ইঁদুরের গায়ে একটি সিরিঞ্জ করে রিএজেন্ট ঢুকিয়ে দিতে পারে। কিন্তু উদ্ভিদ কি তা পারবে?

হয়তো পারবে। মাইক্রোয়েভ রশ্মি দিয়ে আমরা দূর থেকে যন্ত্র চালু করতে পারি, ওদের হাতেও হয়তো তেমন ব্যবস্থা আছে।

মিসির আলি বিছানা ছেড়ে বারান্দায় এসে বসলেন। আকাশে চাঁদ উঠেছে। বাগানটিকে ভারি সুন্দর লাগছে। এত সুন্দর যে মন খারাপ হয়ে যায়।

আপনি আজ আর ঘুমুলেন না, তাই না?

মিসির আলি চমকে উঠলেন। তিনি গলা।

তুমিওতো দেখছি জেগে আছ।

হ্যাঁ আমি জেগেই থাকি।

মিসির আলি কথাবার্তা চালাতে লাগলেন। এ জাতীয় কথাবার্তায় তিনি এখন অভ্যস্ত। আগের মতো অস্বস্তি বোধ হয় না। বরঞ্চ মনে হয় এইতো স্বাভাবিক। বরঞ্চ কথা বলার এই পদ্ধতি অনেক সুন্দর। মুখোমুখি এসে বসার দরকার নেই। দুজন দুজায়গায় থেকে কথা বলে চমৎকার সময় কাটানো।

তিনি, আমি যে এতক্ষণ তোমার বাবার সঙ্গে গল্প করলাম সেটা কি তুমি জানো?

হ্যাঁ জানি। সব কথা শুনেছি।

আমি তোমাকে নিয়ে যা ভেবেছি তাও নিশ্চয়ই জানো?

হ্যাঁ তাও জানি। সব জানি।

আমি কি ঠিক পথে এগুচ্ছি? অর্থাৎ আমার থিওরি কি ঠিক আছে?

কিছু কিছু ঠিক। বেশির ভাগই ঠিক না।

কোন জিনিসগুলি ঠিক না, সেটা কি আমাকে বলবে?

না বলব না।

কেন বলবে না?

তিনি জবাব দিল না। মিসির আলি বললেন, তুমি কি চাও না আমি তোমাকে সাহায্য করি?

না চাই না।

একসময় কিন্তু চেয়েছিলে।

তখন খুব ভয় লাগত, এখন লাগে না।

মিসির আলি খানিকক্ষণ চুপ করে রইলেন। তারপর খুব শান্ত ভঙ্গিতে জিজ্ঞেস করলেন, তুমি বুঝতে পারছ তোমার মধ্যে একটি পরিবর্তন হচ্ছে, তুমি বদলে যাচ্ছ। শেষ পর্যন্ত কী হবে তুমি কি জানো?

জানি।

তুমি কি আমাকে তা বলবে?

না।

আচ্ছা এইটুকু বল তুমি কি একমাত্র মানুষ যার উপর এই পরীক্ষাটি হচ্ছে? না তুমি ছাড়াও আরো অনেককে নিয়ে এ-রকম হয়েছে বা হচ্ছে।

অনেককে নিয়েই হয়েছে। এবং হচ্ছে। এবং এবং...

বল আমি শুনেছি।

এমন একদিন আসবে পৃথিবীর সব মানুষ এ-রকম হয়ে যাবে।

তার মানে?

তখন কত ভালো হবে তাই না? মানুষের কোনো খাবারের কষ্ট থাকবে না। মানুষ কত উন্নত প্রাণী কিন্তু সে তার সবটা সময় নষ্ট করে খাবারের চিন্তায়। এই সময়টা সে নষ্ট করবে না। কত জিনিস সে জানবে। আরো কত ক্ষমতা হবে তার।

কী হবে এতকিছু জেনে?

তিনি খিলখিল করে হেসে উঠল।

মিসির আলি বললেন, হাসছ কেন?

হাসি আসছে তাই হাসছি। মানুষ তো এখনো কিছুই জানে না আর আপনি বলছেন

কী হবে এত জেনে।

তুমি বুঝি অনেক কিছু জেনে ফেলেছ?

হ্যাঁ।

কী কী জানলে বল।

তা বলব না। আপনি এখন ঘুমুতে যান।

আমার ঘুম পাচ্ছে না, আমি আরো কিছুক্ষণ কথা বলব তোমার সঙ্গে।

না আপনি আর কথা বলবেন না। আপনি এখন ঘুমুবেন এবং সকালে উঠে ঢাকা চলে যাবেন। আর কখনো আসবেন না।

আসব না মানে?

ইচ্ছা করলেও আসতে পারবেন না। আমার কথা কিছুই আপনার মনে থাকবে না।

কী বলছ তুমি?

আপনাকে আমার দরকার নেই।

তিনি হাসতে লাগল। মিসির আলি সারারাত বারান্দায় বসে রইলেন। অস্পষ্টভাবে তাঁর মনে হতে লাগল মেয়েটি যা বলছে তাই হবে।

মানুষ যখন কোনো জটিল এক্সপেরিমেন্ট করে তার সাবধানতার সীমা থাকে না। সে তীক্ষ্ণ দৃষ্টি রাখে যেন তার এক্সপেরিমেন্ট নষ্ট না হয়। কেউ এসে যেন তা ভঙল না করে দেয়। যারা এই ছোট্ট মেয়েটিকে নিয়ে এই ভয়াবহ এক্সপেরিমেন্ট করছে তারাও তাই করবে। কে রক্ষা করবে মেয়েটিকে।

ভোররাতের দিকে মিসির আলির শরীর খারাপ লাগতে লাগল। তাঁর কেবলি মনে হল ঢাকায় কী যেন একটা কাজ ফেলে এসেছেন। খুব জরুরি কাজ। এক্ষুনি ফিরে যাওয়া দরকার। কিন্তু কাজটি কী তা মনে পড়ছে না। তিনি ভোর আটটায় ঢাকা রওনা হয়ে গেলেন। বরকত সাহেব বা তিনি কারো কাছ থেকে বিদায় পর্যন্ত নিলেন না।

তিনি ব্র্যাপারটা নিয়ে বড় বড় খাতায় গাদা-গাদা নোট করেছিলেন। সব ফেলে গেলেন, কিছুই সঙ্গে নিলেন না। ঢাকায় পৌঁছার আগেই প্রচণ্ড জ্বরে জ্ঞান হারালেন।

ট্রেনের একজন সহযাত্রী দয়াপরবশ হয়ে তাঁকে পৌঁছে দিলেন ঢাকা মেডিকলে। তিনি প্রায় দুমাস অসুখে ভুগলেন। সময়টা কাটল একটা ঘোরের মধ্যে। পুরোপুরি সুস্থ হতে তাঁর আরো দুমাস লাগল। কিন্তু পুরোপুরি বোধহয় সুস্থ হলেনও না। কিছু কিছু জিনিস তিনি মনে করতে পারেন না। যেমন একদিন অমিতা তাঁকে দেখতে এসে বলল, তুমি শুধু আজোবাজে কাজে ছুটাছুটি কর তারপর একটা অসুখ বাঁধাও। সেইবার হঠাৎ কুমিল্লা এসে উপস্থিত। যেভাবে হঠাৎ আসা সেইভাবে হঠাৎ বিদায়। আমিতো ভেবেই পাই না...।

মিসির আলি অবাক হয়ে বললেন, কুমিল্লা। কুমিল্লা কেন যাব?

সেকি! তোমার মনে নেই?

না তো।

তুমি মামা একটা বিয়ে টিয়ে করে সংসারী হও।

নিউমার্কেটে বইয়ের দোকানে একবার এক ভদ্রলোকের সঙ্গে দেখা। তিনি রাগী গলায় বললেন, যাক আপনার দেখা পাওয়া গেল। বইগুলি তো ফেরত দিলেন না। কেন?

মিসির আলি অবাক হয়ে বললেন, কী বই?

কী বই মানে? বোটানির দুটি বই নিয়ে গেলেন না আমার কাছে থেকে!

তাই নাকি?

আবার বলছেন তাই নাকি। আপনি কি আমাকে চিনতে পারছেন না? আমি ডা. জাবেদ।

না আমি তো ঠিক...।

মিসির আলি খুবই বিব্রতবোধ করলেন কিন্তু কিছুই করার নেই।

এর প্রায় এক বৎসর পর মিসির আলি ময়মনসিংহের এক এডভোকেটের কাছ থেকে এক চিঠি পেলেন। চিঠির বিষয়বস্তু হচ্ছে বরকতউল্লাহ নামের এক ব্যবসায়ী ময়মনসিংহ শহরের বাড়ি মিসির আলিকে দান করেছেন। বাড়ির রক্ষণাবেক্ষণের জন্যে কিছু টাকাও ব্যাংকে জমা আছে। টাকার অঙ্কটি অবশ্য উল্লেখ করা হয় নি। মিসির আলি ভেবেই পেলেন না অপরিচিত এক ভদ্রলোক শুধু শুধু তাঁকে বাড়ি দেবেন কেন?

সেই বাড়ি দেখেও তাঁর বিশ্বয়ের সীমা রইল না। বিশাল বাড়ি। এ্যাডভোকেট ভদ্রলোক গম্বীরমুখে বললেন, বাড়ি অনেকদিন তালাবন্ধ আছে। বাগানের অবস্থা দেখেন না জঙ্গল হয়ে আছে।

মিসির আলি বললেন, আমাকে বাড়িটা কেন দেয়া হয়েছে সেটাইতো বুঝতে পারছি না।

এ্যাডভোকেট ভদ্রলোক বিরক্ত মুখভঙ্গি করলেন। মোটা গলায় বললেন, দিচ্ছে যখন নিন। ইচ্ছা করলে বিক্রি করে দিতে পারেন। ভালো দাম পাবেন। আমার কাছে কাস্টমার আছে। ক্যাশ টাকা দেবে।

মিসির আলি বাড়ি বিক্রি করার ব্যাপারে তেমন কোনো আগ্রহ দেখালেন না। ক্লান্ত গলায় বললেন, আগে দেখি বাড়িটা আমাকে কেন দেয়া হল। আজকালকার দিনে কেউতো আর শুধু শুধু এ-রকম দান খয়রাত করে না! দানপত্রে কি কিছুই লেখা নেই?

তেমন কিছু না। শুধু বাগানের প্রতিটি গাছের যথাসম্ভব যত্ন নেবার জন্যে অনুরোধ করা হয়েছে। উইলের কপি তো পাঠিয়েছি আমি আপনাকে।

মিসির আলি বাড়ি তালাবন্ধ করে ঢাকা ফিরে এলেন। বরকতউল্লাহ লোকটি সম্পর্কে বেশকিছু তথ্য জোগাড় করলেন। জানতে পারলেন যে এর একটি অসুস্থ মেয়ে ছিল। মেয়েটির মাথার ঠিক ছিল না। মেয়েটি মারা যাবার পর ঐ বাড়ির কম্পাউন্ডের ভেতরই তার কবর হয়। ভদ্রলোক নিজেও অল্পদিন পর মারা যান। কিন্তু এর সঙ্গে তাঁর কী সম্পর্ক? মিসির আলি বড়ই অবাক হলেন। জগতে রহস্যময় ব্যাপার এখনো তাহলে ঘটে!



পাঁচ বছর পরের কথা।

মিসির আলি তাঁর স্ত্রীকে নিয়ে ময়মনসিংহে বেড়াতে এসেছেন। তাঁর স্ত্রীর নাম নীলু, হাসিখুশি ধরনের একটি মেয়ে। খুব সহজেই অবাক হয়, অল্পতেই মন খারাপ করে, আবার সামান্য কারণেই মন ভালো হয়ে যায়।

ময়মনসিংহে আসার নীলুর কোনো ইচ্ছা ছিল না। আসতে হয়েছে মিসির আলির আগ্রহে। তিনি বারবার বলেছেন, তোমাকে মজার একটা জিনিস দেখাব।

অনেক চেষ্টা করেও সেই মজার জিনিসটি সম্পর্কে নীলু কিছু জানতে পারে নি। মিসির আলি লোকটি কথা খুব কম বলেন। তিনি প্রশ্নের উত্তরে শুধু হেসে বলেছেন— গেলেই দেখবে। খুব অবাক হবে।

নীলু সত্যি অবাক হল। চোখ কপালে তুলে বলল, এই বাড়িটা তোমার? বল কী? কে তোমাকে এই বাড়ি দিয়েছে?

দিতে হবে কেন, আমি বুঝি কিনতে পারি না?

না পার না। তোমার এত টাকাই নেই।

বরকত সাহেব বলে এক ভদ্রলোক দিয়েছেন।

কেন দিয়েছেন?

ঐটা একটা রহস্য। রহস্য ভেদ করার চেষ্টা করছি। যখন করব তখন জানবে।

গভীর আগ্রহে নীলু বিশাল বাড়িটি ঘুরে-ঘুরে দেখল। বহুদিন এখানে কেউ ঢুকে নি, ভ্যাপসা, পুরানো গন্ধ। দেয়ালে ঘন ঝুল। আসবাবপত্রে ধুলোর আন্তরণ। বাগানে ঘাস হয়েছে হাঁটু উঁচু। পেছনদিকটায় কচুগাছের জঙ্গল। মিসির আলি বললেন, এ তো দেখছি ভয়াবহ অবস্থা।

নীলু বলল, যত ভয়াবহই হোক আমার খুব ভালো লাগছে। বেশ কিছুদিন আমি এ বাড়িতে থাকব কী বল?

কী যে বল। এ বাড়ি এখন মানুষ বাসের অযোগ্য। মাস দু-এক লাগবে বাসের যোগ্য করতে।

তুমি দেখ না কী করি।

কোমর বেঁধে ঘর গোছাতে লাগল নীলু। তার প্রবল উৎসাহ দেখে মিসির আলির কিছু বলতে মায়া লাগল। যেন এই মেয়েটি দীর্ঘদিন পর নিজের ঘর-সংসার পেয়েছে। আনন্দে উৎসাহে ঝলমল করছে। একদিনের ভেতর মালী লাগিয়ে বাগান পরিষ্কার করল। বাজার থেকে চাল ডাল কিনে রান্নার ব্যবস্থা করল। রাতে খাবার সময় চোখ বড় বড় করে বলল, জানো এ বাড়ির ছাদ থেকে পাহাড় দেখা যায়। নীলু পাহাড়ের সারি। কী যে অবাক হয়েছি পাহাড় দেখে।

পাহাড়ের নাম হচ্ছে গারো পাহাড়।

আজ অনেকক্ষণ ছাদে দাঁড়িয়ে পাহাড় দেখলাম। মালী বাগানে কাজ করছিল আমি পাহাড় দেখছিলাম।

ভালো করেছ।

ও ভালো কথা, বাগানে খুব অদ্ভুত ধরনের একটা গাছ আছে। ভোরবেলা তোমাকে দেখাব। কোনো অর্কিড টর্কিড হবে। হলুদ রঙের লতানো গাছ। মেয়েদের চুলে যে-রকম বেণী থাকে সে-রকম বেণী করা। নীল নীল ফুল ফুটেছে।

মিসির আলি তেমন কোনো উৎসাহ দেখালেন। নীল বলল, আচ্ছা এই বাড়িতে থেকে গেলে কেমন হয়?

কী যে বল! ঢাকায় কাজকর্ম ছেড়ে এখানে থাকব?

আমি থাকি? তুমি সপ্তাহে সপ্তাহে এখানে থাকবে। আমার কোনো অসুবিধা হবে না। আমার এ বাড়ি ছেড়ে যেতে ইচ্ছে করছে না।

প্রথম প্রথম এ-রকম মনে হচ্ছে। ক'দিন পর ভালো লাগবে না।

আমার কখনো এ বাড়ি খারাপ লাগবে না। যদি হাজার বছর থাকি তবুও লাগবে না।

আচ্ছা দেখা যাবে।

দেখো তুমি।

আসলেই তাই হল। মিসির আলি লক্ষ্য করলেন এ বাড়ি যেন প্রবল মায়ায় বেঁধে ফেলেছে নীলুকে। ছুটিছাটা হলেই সে ময়মনসিংহ আসবার জন্য অস্থির হয়। একবার এলে আর কিছুতেই ফিরে আসতে চায় না। রীতিমতো কান্নাকাটি করে। বিরক্ত হয়ে মাঝে মাঝে তাকে একা রেখেও চলে এসেছেন। ভেবেছেন ক'দিন একা থাকলে আর থাকতে চাইবে না। কিন্তু তা হয়নি। এ বিচিত্র বাড়িটির প্রতি নীলুর আকর্ষণ বাড়তেই থাকল। শেষটায় এ-রকম হল যে বৎসরের প্রায় অর্ধেক সময় তাদের কাটে এ বাড়িতে।

তাদের প্রথম ছেলেটির জন্মও হল এ বাড়িতে। ঠিক তখন মিসির আলি লক্ষ্য করলেন নীলু যেন পুরোপুরি স্বাভাবিক নয়। একদিন কথা বলতে বলতে হঠাৎ সে বলল, জানো আমাদের এ ছেলেটা আসলে একটা গাছ।

মিসির আলি অবাক হয়ে বললেন, এ-কথা বলছ কেন?

নীলু লজ্জিত স্বরে বলল, এমি বললাম, ঠাট্টা করলাম।

এ কেমন অদ্ভুত ঠাট্টা?

নীলু উঠে চলে গেল। মিসির আলি দেখলেন সে ছাদে দাঁড়িয়ে দূরের গারো পাহাড়ের দিকে একদৃষ্টিতে তাকিয়ে আছে। তার চোখ ভেজা।

সেই অজানা লতানো গাছটি আরো লতা ছেড়ে অনেক বড় হয়েছে। প্রচুর ফুল ফুটিয়েছে। দিনের বেলা সে-ফুলের কোনো গন্ধ পাওয়া যায় না। কিন্তু যতই রাত বাড়ে মিষ্টি সুবাসে বাড়ি ভরে যায়। মিসির আলির অস্বস্তি বোধ হয়, কিন্তু যতই রাত বাড়ে অস্বস্তির কারণ তিনি ধরতে পারেন না।

তিনি তাঁর ছেলেকে নিয়েও খুব দৃষ্টিস্তা বোধ করেন। ছেলেটি সবে হামা দিতে শিখেছে। সে ফাঁক ফেলেই হামা দিয়ে ছাদে উঠে যায়। চুপচাপ রোদে বসে থাকে। তাকে নামিয়ে আনতে গেলেই হাত ছুড়ে বড্ড কান্নাকাটি করে।